



WANTOK

Niuspepa bilong yumi ol PNG stret!

Wan Wik,

Mas 10 - 16, 2005

NAMBA 1599

K1.00 tasol



**Pes 16 - Drum Drum karim
nem bilong PNG**

Pes 18 - Radio Australia tok pisin news



OCEAN BLUE

**Tuna in oil
Rait teist
yah!**



Pes 30 -

NRL i kambek!

**Lukim pes 2 long
tokaut bilong
nupela prais
bilong Wantok
pepa.**

Wari long Manam

*...Nogat graun long
planim ol dai bodi*

**Sr. Helen Augusta SSps
i raitim**

BIKPELA pairap na bagarap bilong maunten pala long Manam ailan long Oktoba las ya i lukim ol pipel i lusim asples na i go sindaun long bikples Bogia insait long tripela ples we ol plentesen bilong gavman i stap long en.

Sr. Helen Augusta SSps i raitim ol toktok long wanem kain wari na hevi na ol senis i kamap nau taim ol pipel i go sindaun nau long ol kea senta long Bogia.

Klostu olsem eleven tausen pipel (11,000) i stap nau long ol dispela ol tripela kea senta.

Sampela ol i stap insait long ol pies wantaim ol viles komyuniti na sampela arapela ol i stap klostu long rot i go. Sapos yu go na lukim ol pipel long dispela ol kea senta na sindaun na harim na luksave long wanem samting tru i stap long bel na lewa bilong ol, bai yu harim stori na wari bilong ol. Ol i autim wari bilong ol olsem:

Sindaun bilong mipela i rabis tru. Wanem samting bai i kamap bihain long ol pikinini bilong mipela? Mipela i lusim graun bilong mipela na sindaun long graun bilong ol arapela man.

Nogat graun bilong wokim gaden bilong planim gaden kaikai bilong kisim gutpela kaikai, rais tasol. Tru, planti gutpela pipel i helpim mipela. Ol dispela gutpela Samaritans tu bai i sot long kaikai na bai wanem samting i kamap long mipela long helpim mipela yet?

Namba tu wari bilong mipela em long gutpela sindaun bilong mipela (Helt).

Plenti pikinini, lapun, man meri tu i sik long malaria. Ol arapela sik tu i kamap bikos mipela i paspas long liklik hap na sik i hariap tru long go long ol arapela. Sampela indai i kamap insait long Kea Senta. Na i hat tru long painim ples bilong planim bodi. Manam ailan i birua na sol wara katim rot bilong go planim. Na mipela bai planim bodi we?

Wara tu em i wanpela wari bilong mipela. Long bikpela kea Senta long Asuramba. Ol meri na pikinini i go longwe long kisim wara. Long Bostam mipela i tenkim God na tenkim ol Ami na World Vision long bikpela helpim ol i givim mipela long wara na toilet.

I go moa long pes 2



Hat laip bilong painim wara em yu inap pilim taim yu lusim asples na go sindaun long narapela hap graun. Ol mama na pikinini meri long Asuramba kea senta long Bogia i go painim wara na karim i kam bek long kem bilong ol. Foto: FR PHILIP GIBBS SVD



Coleman lamp istap long olgeta Brian Bell stua na Authorised Dealer

Ripot

Nesenel Kapitel Distrik:

BOSMAN bilong ol polis long Nesenel Kapitel Distrik na Sentral provins Tony Wagambie i tok strong long ol skul pikinini long strong long skul na maski long go insait long ol kalt pasin na hombru.

Mista Wagambie i bin wokim dispela toktok bihain long moa long 100 sumatin i bin stap insait long seremoni long kamap ol memba bilong kalt long Gerehu long dispela wik Mande.

Em i tok moa long 100 skul pikinini bilong praimer, hai skul, sekenderi na nesenel hai level i bin stap insait long dispela seremoni long tais (swamp) eria long Gerehu.

Mista Wagambie i bin tok tude i nogat inap wok na e mi moabeta long ol i wok hat na putim olgeta strong bilong ol long skul na i no long ol bikhet pasin we bai bagarapim tingting na laip bilong ol.

Em i bin tok ol bai sasim ol sumatin sapos samting ol i wokim i egensim lo.

Morobe:

Ol polis bai sut long kilim ol bikhet man na ol draiva i kisim tok long ron antap long ol man na kilim ol sapos ol i sanap blokim rot bilong ol wantaim ol naip, akis, gan na ol arapela samting moa bilong bagarapim narapela man.

Bosman bilong ol polisman long Momase rijon Giossi Lab i wokim dispela strongpela toktok bihain long polis i bin sut na kamapim bagarap long tupela raskol husat i bin laik wokim holap long 3 Mail seksen bilong Hailans Haiwe klostu long Lae las Fraide.

Mista Lab i salim strongpela tok lukaut i go long ol raskol olsem polis bai ino inap long givim mari-mari wantaim ol raskol o bikhet man husat i bagarapim gutpela sindaun na tu, kamapim pret pasin long ol pipel.



Amamasim Bondei...Taim bilong tingim taim yu bin kamap em i bikpela samting. Wankain tu taim yu wok long wanpela kampani o bisnis na yupela i bungim 9-pela yia. Ol dispela wok manmeri bilong Workers Mutual Group i amamas tru na katim keik bilong makim namba 9 yia bilong ol long wok olsem bisnis. Ol bosman na wok manmeri wantaim i bin makim dispela taim bilong givim luksave long Mande long dispela wik. Foto: NEVILLE CHOI

Rausim timba kampani RH

Maisan Pahun i raitim

TUPELA papagraun bilong wanpela logging projek long Galp provins i tokim ol ogenaiesen na gavman long rausim Rimbunan Hijau (RH) logging kampani long eria bilong ol.

Dispela toktok bilong tupela i bin kamap bihain long RH logging kampani i promis long bringim sevis olsem skul, haus sik na narapela developmen i go insait i no kamap. Em long stat bilong yia 1992 inap nau we kampani i kisim nupela kontrak long 2002 na nogat wanpela senis i kamap. "Ol ripot na toktok i save kamap olsem ol timba kampani save mekim pasin nogut long ol meri bilong mipela em i tru," Max Mera i tok.

Ivan Keo na Max Mera i bilong Vailala Purari long Galp provins na nau yet i gat bikpela timba operesen long eria bilong ol. Aninit long agri-men we kampani bai katim diwai bilong ol na bihain bringim sevis i go insait i no kamap olsem ol i tok.

Dispela kain hevi i bikpela tru insait long ol logging eria bilong Papua Niugini. PNG eco-forestry forum wantaim Green Peace International i sapotim dispela toktok bilong tupela papagraun na nau ol i laikim Minista bilong Forestri, Patrick Pruiatch, long risain long wok bilong bikos em i no mekim wok bilong em stret.

Wok bilong Minista em i bilong lukautim fores menesmen na kamapim gutpela lo we ol kampani i mas bihainim long operesen bilong ol. Dispela i no save kamap na planti komplek tru nau i stap long han bilong em.

"Dispela i soim klia olsem Minista i no save mekim wok bilong em long kamapim ol rong bilong ol timba kampani insait long kantri. Olsem na em i mas risain," Dorothy Tekwie bilong Green peace i tok.

Wanpela televisen program i bin kamap long SBS olsem RH kampani i save wokim nogut long ol logging eria na tu baim ol polis long pasim maus bilong ol papagraun.

Bikpela wari long Manam

I kam long pes 1.

Namba tri bikpela wari bilong mipela em long skul (Edukesin) bilong ol pikinini bilong mipela.

Gavman i bin promisim mipela bai pikinini i ken sindaun long skul taim skul i stat long 2005.

Ol buldosa i kliaim ples bilong skul long kea Senta, tasol mipela i wet wet, na wet na nogat wanpela samting i kamap.

Nating God i sori na marimari long mipela. Prinsipal, sampela tisa husait i bilong Manam yet, na ol sista bilong Malala Katolik Sekenderi skul i bin luksave long wari bilong mipela. Na ol i bin helpim mipela.

Mipela i bin toktok wantaim ol na bihain mipela i tingim olsem:

Plantil ol pikinini i no go long skul. Ol skul klostu long Senta i no gat spes long ol.

Sampela i gat spes tasol rot i long we tru, olsem na bai ol i mekim wanem samting?

Yumi bin tingting olsem yumi mas kirapim skul long Senta. Ol buldosa i kliaim ples i stap.

Tasol, nogat samting i kamap yet. Olsem mipela yet i wokim klasrum pastaim, na bihain gavman i ken wokim gutpela samting long taim bilong em.

Laki tru, ol Holi Spirit Sisters wantaim Prinsipal na sampela tisa bilong Malala i helpim mipela.

Na isi isi long strong bilong mipela na helpim bilong Bikpela na helpim bilong ol sampela gutpela manmeri samting i go het.

TRAIN FOR SUCCESS IN 2005!

YOUR professional accredited Certificate or Diploma, or Degree.

Professional accredited British Career Training

Cambridge International is the key to a successful career. Invest in accredited qualifications and skills for a great future.

International Diplomas (£130 or US\$260)

- * Accounting, Hotels, Tourism, Computers
- * Business, Management, Stores, English
- * Personnel, Marketing, Advertising, Insurance
- * Economics, Secretary, Purchasing, Stores


Advanced & Honours Diplomas and MBAs

- * Business, Marketing, Finance, Personnel

For your FREE Information book contact:

CAMBRIDGE INTERNATIONAL COLLEGE
P O Box 53, Southampton,
SO14 0YP, England, Britain.
Fax: + 44 2380 337200
Web: www.cambridgecollege.co.uk
Email: info@cambridgetraining.com

Accredited British Training & Education registered with the National Training Council & Ministry of Labour of Papua New Guinea



Mosbi polis holim 8-pela sumatin long dring hombru

Paulus Tail i raitim

POLIS long Gerehu long Mosbi i holim 8-pela sumatin husat i wok long mekim na dring hombru o strongpela bia ol yet i mekim.

Polis i holim ol dispela manki long Gerehu stes 5 we ol i wok long dring insait long bus i stap.

Polis Stesen Komanda bilong Gerehu, Inspekta Benjamin Turi i tok samting olsem 100 sumatin i bung long hap na i wok long dring i stap long 12 kilok long san long Sarere na taim polis i kamap olgeta wantaim wanpela meri namel long ol i ronawe na ol i kisim dispela 8-pela tasol.

Em i tok ol sumatin i kamap long kainkain

skul long Nesenel Kapitel Distrik (NCD) tasol long dispela 8-pela, wanpela bilong Pot Mosbi Nesenel Hai Skul, tupela bilong Philip Aravure, tripela bilong Gerehu Sekenderi skul, wanpela bilong Gordon Sekenderi skul na wanpela bilong Tokarara Hai Skul na krismas bilong ol i stap namel long 13 na 17.

Ol dispela manki i mekim dispela dring long Fraide nait yet i kam inap moning bilong Sarere na i go inap long 12 kilok taim polis i bungim ol.

Faipela polis man i harim nois bilong ol dispela lain i singaut nabaut insait long bus na ol i bihainim i go na lukim ol.

Taim polis i kamap ol sumatin i kirap nogut na traim long ronawe na ol i pusim wanpela

polisman husat i pundaun tasol em i no kisim bikpela bagarap tumas.

Inspekta Turi i singaut i go long ol tisa na ol mamapapa long ol i mas was gut long ol pikinini bilong ol na ol i noken i go raun nabaut bihain long skul.

Inspekta Turi i tok taim ol i save go raun long lukim ol poro bilong ol em ol i save go long mekim dispela kain ol pasin we i no gutpela long ol na i no stret tu long ai bilong lo.

Singaut tu i go long ol manmeri long wok bung wantaim long stopim kain hevi olsem.

"Hombru em i nogut na em i ken bagarapim lewa bilong yupela," Inspekta Turi i tok.

Ol sumatin nau i stap long Boroko sel na wetim kot bilong ol.



INSAIT long selebren bilong Intanesenel Wimens De long Mas 8, luksave i bin go tu long biknem meri, Leit Dame Rose Kekedo, husat i bin putim bikpela han mak long developmen bilong ol meri, edukesen na ol arapela wok insait long kantri.

Ol meri i bin bung long Crown Plaza long amamasim Intanesenel Wimens De. Tupela minit ol i sanap isi na tingim leit Dame Rose.

Dame Rose i dai long las wik long haus bilong em long Mosbi bihain long em i bin sik long longpela taim na ol bin planim em long 9-Mail matmat ausait long Mosbi.

Presiden bilong Nesenel Kaunsel ov Wimen (NCW) Nahau Rooney i tok leit Dame Rose em i trupela piksa bilong ol meri long PNG husat i bin wok hat tru long helpim long developim kantri.

- Veronica Hatutasi



Mondo Helpim Manam...Bikpela seken han klos bisnis insait long Mosbi, Mondo Second Hand Clothing nau i opim han long helpim ol pipel bilong Manam, Madang provins, wantaim klos. Long Mande long dispela wik, Mondo i bungim samting olsem 60 bel klos we hevi bilong i klostu 4 tan. Papa bilong Mondo Seken Han, John Mori (namba tu long Lephan) i bin stap long givim klos i go long Commodore Peter Ilau, Minista bilong Difens, Matthew Gubag na Seketeri bilong Difens Fred Punangi long bikpela stua bilong Mondo long Konedobu. Dispela klos em olgeta klos i stap insait long tripela stua bilong ol insait long Mosbi siti. Foto: NEVILLE CHOI

Ol sumatin bilong UPNG i kisim taim

Maisan Pahun i raitim

BIKPELA belhevi nau i stap namel long long ol sumatin bilong Yunivesiti ov Papua Niugini (UPNG) long wanem ol i no statim wanpela klas yet bilong dispela yia.

Dispela i kamap bikos long ol tisa na leksara bilong UPNG i kamapim wanpela bikpela straik we ol i laikim gavman long apim pei bilong ol. Olsem na stat bilong dispela mun taim ol sumatin i kam rejista long klas pinis na ol i stap nating na nogat wanpela klas i kamap yet.

Dispela i bagarapim tingting bilong planti sumatin bikos ol tu i nogat Student Representative Council (SRC) long makim maus bilong ol long dispela taim. Ol i pasim maus tasol na slip kirap kaikai na raun nating long siti i stap.

"Em tupela wik bilong skul kalenda nau we mipela i abrusim pinis na husat tru bai makim mipela na tokim ol atoriti olsem mipela i baim mani long kam skul tasol nogat klas," wan-

pela sumatin i tok taim *Wantok Niuspepa* i go raun long UPNG.

Planti sumatin we i autim bel hevi bilong ol long dispela niuspepa i les long givim nem bilong ol bikos sapos UPNG edministresen i painim aut bai ol i rausim ol long skul bikos ol i tok agensim edministresen. Nau yet UPNG i nogat SRC we i save makim maus bilong ol sumatin long taim nogut na gutpela taim. I bin gat wanpela notis i kam long Vais Sensela (VC) na long edministresen olsem sapos wanpela skul sumatin i straik o tok agens bai em i raus long skul.

Aninit long wanpela Nesenel Gavman oda i go long UPNG edministresen long yia 2002 i tok olsem UPNG i mas stopim (ban) dispela SRC bilong em bikos ol sumatin i save straik tumas na bagarapim lukluk bilong dispela kantri.

Tasol long kain taim olsem we ol sumatin i kisim taim long skul ol i gat ol rait long toktok. "Olgeta we bilong mipela long opim maus na toktok long wanem samting nogut i kamap

long dispela ples na kantri tu i pas pinis. Ating mipela stap long kalabus o," wanpela fainel yia sumatin i tok.

Olgeta UPNG leksara wantaim ol yunivesiti wokman i stap aut long wokples bilong ol na wetim VC Leslie Eastcott, Rejistrar Vincent Malaibe, Bursar Edward Croake na pro VC Margaret Obi long risain.

Dispela straik long rausim ol dispela foapela lain long opis bai i no inap kamap sapos dispela foapela lain i bin stretim toktok wantaim gavman long apim pei bilong ol leksara.

Dispela hevi i bin kamap taim gavman i givim olgeta pablik seven insait long kantri i bin kisim pei i go antap long las yia.

Tasol ol wokman na leksara long yunivesiti i no bin stap aninit long dispela senis bilong apim pei.

Ol wokman na leksara husat i straik em ol i save wok long mein o bikpela kempes long Waigani, Medikel skul long Taurama na ol open kolis long kantri.



WANEM taim bai mipela hia long Papua Niugini i luksave olsem sampela taim, yumi noken save harim tumas ol tokwin long ol kain bikpela bagarap olsem raunwin o sunami? Dispela wik bikpela raun win long Australia i mekim na wanpela bikpela glaman toktok i wok long muv olsem wanpela raun win tu insait long Mosbi siti. Sapos yu harim wanpela tok win olsem wanpela bikpela bagarap bai kamap long wanpela hap, putim iau long redio, TV na traim ritim tu *Wantok Niuspepa* bai sindaun i orait na bel bai i isi. Noken bibihainim tasol toktok i kamaut long maus bilong ol man nating.

BIKPELA win na ren i kam long dispela raunwin Ingrid long Australia i mas holim pasim rot bilong wanpela wantok long Alotau tu ya. Misis i kisim tok-save olsem em i silip long haus sik na em i bel sut tru. Tasol nogat. Boi nogut i orait. Sampela hap bilong bodi tasol i no wok. Ating sapos em i kam bek long as ples Mosbi bai sindaun i orait.

YUPELA harim tu stori bilong dispela liklik manki i karim pistol bilong papa bilong em i go long skul? Man, wanem kain papa tru bai lusim pistol bilong nabaut long haus na pikinini i karim i go long skul? Nau mipela i laik traim daunim pasin bilong holim ol kain kain gan, tasol ol liklik manki i ken karim pistol i go long skul.

NARAPELA wantok i bin kirap nogut long lukim planti long ol yangpela sumatin bilong ol kainkain skul i bung na dring i stap long Gerehu taiswara eria na mekim kalt pasin i stap taim ol polis i bin go na ronim ol. Em i tok i gutpela long ol sumatin long wok hat na skul gut na maski long dring hombru na mekim kalt pasin. Ol dispela samting i no inap long helpim ol. Papamama i tromoim bikpela mani long salim yupela long skul we yupela i mas skul gut na kisim wok long stretim bihain taim bilong yupela. Dispela i nogut tru ya. Yupela ol sumatin i go long skul o go long wokim ol kain bikhet pasin?

MIPELA i stap long mun Mas nau. Long wankain taim las yia, *Wantok Niuspepa* i bin opim nupela opis. Long dispela taim tu mipela i kisim bikpela tok amamas na tok promis olsem bikman bilong kantri bai givim liklik toea long helpim wok bilong ol sios long *Wantok Niuspepa*. Nau i laik kamap wanpela yia nau na mipela i laik win tasol na stap. Mipela i no save, dispela hap toktok i go lus long wanem hap?

POSITION VACANT

Registered Nursing Officer

Ten Z Medical centre is looking for a Registered Nursing officer.

A God fearing, honest and self motivated person.
Has Midwife certificate.
Have management and leadership skills.
Prepared to work long hours.

Apply in writing to:

The Director
Ten Z Medical Centre
P.O. Box 1603.
BOROKO.

Hap Hap Nius

Kavieng

Kavieng long Nu Ailan provins nau i wok long lukluk long sanapim wanpela ples bilong daiv we bai i ken resis wantaim ol arapela bikipela daiv ples long wol. Membra bilong Kavieng, Martin Aini i tok dispela nupela developmen bai i gat wanpela 4 sta daiv risot wantaim 80 bet na bai i sindaun long sait bilong nambis. Bai i gat wanpela 5-sta profesenel daiv senta tu we ol bai sanapim long Kavieng Harbour na bai i gat wanpela jeti o liklik bris we inap long kisim foapela daiv bot, wanpela daiv stoa na ples bilong stretim ol samting bilong daiv.

Tiensten

MEMBA bilong Pomio na Minista bilong Tred na Industri, Paul Tiensten, i laik kamapim bikipela senis insait long ilektoret bilong em. Taim em i raun long ilektoret bilong em las wik, em i tokaut long tripela bikipela projek we olgeta arapela senis bai kamap long en. Namba wan bikipela projek em ol integretet ruel developmen projek bilong forestri na agrikalsa long Is Pomio na Sinivit LLG. Dispela bai karamapim 125km rot i go long Kokopo. Namba tu projek em Cape Orford-Pomio agrikalsa projek we i laik wankain olsem Ili-Wawa projek, tasol dispela em projek bilong kopi mil na ol rot i go insait long ol ples we ol bai groim kopi. Narapela projek em Ania i go long Sigite agrikalsa projek.

Ileksen bilong Bogenvil otonomi gavman bai stat

Veronica Hatutasi i raitim

ILEKSEN bilong nupela Otonomi Gavman bilong Bogenvil bai stat long Me 20 na pinis bihain long tupela wik long Jun 2. Ol bai givim auto Rit o ol ileksen pepa long Epril 14.

Na ol bai kisim bek gen ol rit o ilksen pepa long Jun 9.

Ol kendidet bai resis long 40 sia. Ol i karamapim Opis bilong Presiden we wanpela man bai winim, Ol memba i makim ol wan wan konstituensi em i stap long mak bilong 33, tripela sia bilong ol meri na tripela sia bilong ol eks paitman.

Siaman bilong Join Interim Bogenvil Provinsel Gavman wantaim Bogenvil Pipels Kongres bai givim aut ol rit pepa long resis long ol sia.

Ileksen Menesa bilong Bogenvil Otonomi Gavman, Mathias Pihei, i tok sapos ol wok i go gut na man i kam gut tu, em bilip olsem ol bai inapim ol wok we ol i mas mekim kamap long redi long otonomi gavman ileksen. Dispela em ol wok long sanapim ol Baunderi, Komon Rol, ol Polisi, Ileksen fom, baim ol masin bilong yusim long ileksen wok, wok trening bilong ol opisa na ol arapela moa.

Namba wan rivyu bilong Baundri Komisnin i redi pinis bai gat wanpela bung wantaim ol Distrik Menesa na Baundri Komisnin long toktok long dis-



• Ol bikman bilong Bogenvil i bung long Buin long toktok long nupela gavman Bogenvil i laik kirapim klostu taim. Em long otonomi gavman. Ol rit o pepa bilong vot bai go aut long Epril 14 na ileksen bai stat long Mei 20. FAIL FOTO

pela samting na bihain autim nius i go long pablik.

Mista Pihei i tok ol i givim wanpela wik long pablik i wokim ol komen bilong ol na givim tok egensim o sapos bilong ol. Na taim em long las wik i kam inap long dispela wik Mande Februari 28.

Interim Bogenvil Provinsel Gavman bai glasim dispela ripot na wokim disisen long kisim o tok nogat long

ripot bilong Baundri Komisnin.

Mista Pihei i tok stat long dispela wik, ol ilektoret opisa i sindaun long trening program bilong ol. Wok long ol Komon Rol bai pinis long Epril 7. Ol i primin pinis tu olgeta Balot pepa na ol arapela ileksen fom.

Mista Pihei i tok Bogenvil bai yusim ol fom bilong em yet long otonomi gavman ilksen bilong em na i no dispela we ol i yusim long PNG nesenel

ileksen.

Em i tok tu olsem ol bai yusim olpela sistem bilong vot we ol i save putim tik long kendidet ol i laikim na i no nupela sistem we PNG i bihainim nau we ol i putim 1,2 na 3 long nem bilong ol kendidet.

Ol bai bihainim olpela sistem bikos i nogat wok aweanes yet i kamap long nupela sistem bilong vot long Bogenvil.

Somare na Ling-Stuckey bai toktok long ol PIP

NESENEL Plening na Ruel Developmen Minista Arthur Somare bai raun i go long Nu Ailan long paitim toktok wantaim Gavana bilong Nu Ailan Ian Ling-Stuckey long ol bikipela Pablik Invesmen Program (PIP) projek.

Mista Somare bai kamap long Kavieng long Fraide na em bai bung wantaim Gavana Ling-Stuckey long paitim toktok long ol projek we Provinsel Eksekutiv Kaunsel i givim tok orait long en.

"I gat sampela samting wantaim Lihir main na samting olsem K130 milien we nesenel gavman i mas peim long Nu Ailan provinsel gavman," Mista Ling-Stuckey i tok.

Ol arapela samting ol bai toktok long en em wok bilong silim Boluminsky Haiwe, apgred wok bilong Namatanai pawa na wara saplai, apgreding wok long Kavieng haus sik, Konos ples balus nupela provinsel hetkwota na ol arapela bikipela PIP projek.

Hutjena Sekenderi statim skul yia

HUTJENA Sekenderi skul long Buka, Bogenvil i bin statim 2005 skul yia bilong em long las wik Mande bihain long em i pas inap wanpela mun.

Skul i gat moa long 800 sumatin i kam long olgeta hap bilong Bogenvil. Em i save kisim ol gret 9 inap long gret 12 sumatin tasol.

Ripot i kam long Bogenvil i tok ol lain Homeguard bilong ples Hangan i bin tok olsem ol bai i no inap long wokim samting moa long stopim skul na olsem skul i bin singautim bek gen ol sumatin na ol klas i stat long las wik Mande.

Ol lain bilong Hangan Homeguard i bin laikim gavman i peim kompensesen mani long ol long lukautim skul na i no bagarap long taim bilong Bogenvil hevi.

Ripot i tok bikos skul i no bin skul long wanpela mun, em i mas skruim ol ekstra priet bai ol i ken stap long wankain mak long lainim samting wantaim ol arapela gret 11 na 12 sumatin insait long kantri.

Long nau yet i gat planti hevi long sait bilong edukesen, i no long Bogenvil tasol, tasol long planti hap bilong kantri. I no longtaim i go pinis wanpela sumatin i bin sutim narapela wantaim naip long Mosbi.

- Veronica Hatutasi

Nupela gavman bai lukluk long ol askim

BOGENVIL Edministresen i kirapim wanpela komiti long lukluk long ol kleim tasol bikipela wok long dispela em nupela otonomi gavman we ol bai sanapim long dispela yia bai mekim.

Ripot i kam long Buka i tok ol bai lukluk pastaim long ol kleim i sut long sevis we ol (bisnis haus, grup o wan wan man) i bin givim long gavman long taim bilong kisim ol sevis long stretim bek Bogenvil long en.

Ripot i tok ol kleim we i sut long ol samting bilong Bogenvil hevi em ol bai lusim pastaim long otonomi gavman i lukluk long en taim em i sanap na stat long wok.

Long ol arapela nius long Bogenvil, wanpela medikel lain i bin lusim Buka long sip MV Sankamap long sekim ripot long wanpela sik i kamap long Motlok Ailan.

Dokta Cyril Imako i go pas long dispela grup.

Ripot long Buka i tok Provinsel Helt opis long Buka i bin kisim ripot i kam long Motlok Ailan olsem klostu 30 pipel we i karamapim ol pikinini na ol

bikipela manmeri i bin go long haus sik wantaim sik pekpek wara, bel pen.

Ripot it ok bikos etpos long ailan i bin kisim bikipela mak bilong manmeri wantaim dispela sik, ol bin lukim olsem dispela i narakain long ol sik we ol i lukim long olgeta de na ol i salim tok i go long Buka long lukluk long en.

Taim Wantok i laik kisim moa ripot long dispela long Buka, ol it ok Medikel tim is tap yet long Motlok na e mi hat long kisim ol toktok long ailan bikos i nogat gutpela rot long salim toktok i go na i kam namel long ailan na Buka na ausait.

Medikel tim na sampela opisa bilong Bogenvil Edministresen i bin go long Motlok na nau ol ripot i tok ol bai stap yet long narapela tupela wik antap, wetim sip i go bek na kisim ol.

Ol ripot i tok MV Sankamap i bin lusim Helt na Edministresen grup long ailan long wanem em bin bungim sampela hevi na em i mas kam bek long Buka long stretim pastaim. - Veronica Hatutasi



Madang bai kirapim bek seavings na lon sosaiti

Michael Novingu i raitim

MADANG Provinsel Gavman i kamap wantaim tingting long kamapim gen seavings na lon sosaiti long helpim ol pipel bilong Madang we ol i no inap long kisim ol gutpela sevis long ol komesel benk.

Statim gen dispela Madang Seavings na Lon Sosaiti bai helpim na impruvim sosel na ikonomik stail bilong ol liklik manmeri long ples insait long Madang provins.

Madang Provinsel Gavman i go pas long kirapim bek dispela seavings na lon sosaiti skim long helpim ol turangu lain long ples long wanem ol bikpela benk i gat kain kain lo bilong ol long bihainim long kisim dinau mani long kamapim gutpela sindaun bilong ol.

Lakekamu papagraun i no laikim wel pam

Andrew Molen
i raitim

OL PAPAGRAUN bilong Lakekamu besin long Moveave klostu long boda bilong Morobe na Galp provins i tok ol i no laikim bai dispela wel pam projek we wanpela kampani bilong Amerika i laik mekim o wanem kain arapela projek i kamap long graun bilong ol.

Wanpela papagraun na mausman bilong Moveave Miavu Oaibe ILG, Thaddeus Ehava, i mekim dispela toktok bihainim wanpela ripot i kamap long *National Niuspepa* las wik olsem wanpela kampani bilong Amerika wantaim provinsel gavman bilong Morobe na Galp wantaim ol Himea Himanato Farmers Association (HHFA) o ol Angans bilong Aseki long Morobe provins i laik kamapim wanpela bikpela wel pam projek long dispela hap we i nap mekim mani mak olsem K3 milien long wanpela yia.

"Mipela i no laikim wanpela wel pam o wanem kain narapela projek i kamap long

graun bilong mipela," Mista Ehava i tok.

Em i tok ol i raitim planti pas na givim planti toktok i go long Morobe na Galp Provinsel Gavman tasol i save nogat wanpela bekim.

"Plantit taim tru mipela i tokim ol pinis olsem mipela i no laikim wanpela bilong dispela ol projek i kamap tasol ol i no harim tok na ol i strong yet bai dispela ol samting i kamap.

"Mipela i no laikim, risetelmen plen bilong gavman, wel pam, gol main, loging o katim diwai, rot i kam katim olsem na i go join wantaim hailans haiwe o wanem kain arapela projek.

"Wanpela kampani tasol mipela bai tok orait long i go insait long graun bilong mipela em InterOil na wanem ol kampani i wok aninit long en, nogat narapela," Mista Ehava i tok.

Em i tok samting ol i laikim antap moa em eko turisim, em tasol na i nogat narapela bikos ol i no laik bagarapim bus na graun.

Mani mak olsem K10,000.00 olgeta em Madang Provinsel Gavman i givim i go pinis long Komes na Turisim Divisen long karimaut wok painimaut long kirapim dispela projek.

Ektim bosman bilong Komes Divisen long Madang Provinsel Gavman, Kileng Kamar, i tok dispela seavings na lon sosaiti bai rejista aninit long lo bilong lon sosaiti ekt.

"Mipela i paitim toktok pinis wantaim benk bilong Saut Pasifik (BSP), Komes na Turisim na Provinsel Gavman long stretim na pinisim ol pepa wok bilong dispela projek," Mista Kamar i tok.

Mista Kamar i tok moa olsem provinsel gavman i gat strongpela bilip olsem taim benk i stat wok bai mekim sindaun bilong ol pipel bilong Madang bai isi tru.

As tingting bilong provinsel gavman long kirapim bek dispela seavings na lon sosaiti benk i bilong helpim ol pipel long ples long mekim isi long putim na rausim mani bilong ol, husat yu i gat sea na helpim long kamapim strong ikonomi na developmen insait long ol komyuniti insait long Madang provins., em i tok.

Madang Seavings na Lon Sosaiti bai wankain olsem Sepik Seavings na Lon Sosaiti na ol arapela insait long dispela kantri na tu bai helpim ol pipel long sevim mani bilong ol na rausim na yusim long gutpela rot.


Ol pipel bilong Madang i stap long arapela provins na ol i wok i stap long hia i welkam long kamap memba bilong Madang Seavings na Lon Sosaiti.



Senis...Ol

senis i kamap wantaim ol Manam pipel long Madang provins. Ol pikinini long Manam i sanap lain long go bek long skul gen. Ol papa i hariap long sanapim klasrum long kea senta bai ol pikinini i ken sindaun na skul.

Ol foto:
FR PHIL GIBBS
SVD



Hap Hap Nius

Mumeng

Ol kaunsel na lida bilong Mumeng distrik long Morobe provins i no amamas long lukim sampela bikpela sevis long distrik bilong ol i pas pinis. Ol i pret nau olsem haus sik bilong ol tu bai pas. Ol kaunsel i autim wari olsem polis stesen tu i no gutpela na ol polisman i wok long karimaut wok bilong ol long haus bilong ol yet. Wankain tu em kaunsel opis bilong ol tu i pas pinis bikos haus i bagarap long taim wara Kumalu i bin tait na bagarapim ples. Ol skul pikinini tu i no kisim gut skul nau bikos wara i bagarapim skul eria na ol klasrum.

Helpim

Ol vanilla manmeri bilong Maprik distrik long Is Sepik provins i soim gutpela pasin bilong ol na i givim helpim i go long ol pipel i kisim bagarap long Manam Aitan long Madang provins na Saut Is Esia we bikpela solwara i kisim planti tausen manmeri pinis. Ol dispela pipel bilong Is Sepik provins i givim mani mak olsem K6,045.21 i go long helpim ol Manam na Saut Is Esia pipel.

Bagarap

Wanpela polis stesen tasol bilong saut kos bilong Morobe provins i bin bagarap taim wanpela kokonas diwai i bin pundaun antap long en i no longtaim i go pinis. Liklik grup bilong ol polis manmeri husat i save wok long dispela stesen nau i nogat opis long wok long en na hap ol i save kalabusim ol manmeri long en i bagarap olgeta. Ol lokel lida i singaut long ol bikman bilong polis long hariap stretim dispela stesen.

NOKEN BAGARAPIM OL PIKININI!



Em i rait bilong ol pikinini husat lgat sik o hevi long badi bilong ol long kielm gutpela lukautilm.



Na emi wok bilong ol long lukautilm gut ol narapela husat lgat sik o hevi long badi bilong ol.



WANTOK
i go pas
long dispela
kempen

Hap Hap Nius

Mariwana

Hevi bilong mariwana o spak brus i kamapim bikpela wari long ol mama long Simbu provins. Mausmeri bilong ol meri long Simbu Provinsel Gavman Asembli Martha Kaium i tok planti yangpela i no sindaun gut bikos mariwana i bagarapim sindaun bilong ol nau na ol i sik nabaut. Long dispela tasol ol yangpela i no save mekim wanpela gutpela wok bilong sevim komyniti.

Kros

Polis i no kisim gutpela ripot yet long pasin sampela lain i mekim long brukim ol samting long kot haus long Wabag las wik. Ol lain bilong wanpela yangpela meri i bin kamap long harim kot we wanpela man i bin holim na bagarapim (reip) dispela yangpela meri. Tasol ol i kros taim kot i givim K200 beil long dispela man na ol i kros na brukim ol samting long kot.

Ol nupela bris bilong Sauten Hailans provins

Yakam Kelo i raitim

SAUTEN Hailans provins bai lukim ol PNG Difens Fos (PNGDF) soldia i wokim ol bris projek long provins bilong ol long dispela yia.

Long dispela wik Gavana bilong Sauten Hailans, Hani Yawari, i givim K200,000 i go long PNGDF long kari-maut dispela bris projek long provins.

Minista bilong Woks, Gabriel Kapris, tu i givim narapela K200,000 bilong dipatmen bilong em i go long kamapim dispela bris projek long Sauten Hailans provins.

Mista Yawari i tok dispela bris projek em wanpela bikpela sevis long provins bilong em we ol i save toktok planti long kamapim na nau em i no laik wet tasol wok i mas kamap hari-ap. Olsem na em i no laik wetim nesenel gavman tasol em i mas putim sampela mani i go pas long kamapim dispela wok na nesenel gavman i ken kam bihain na helpim.

Mista Yawari i askim ol arapela provinsel gavman tu long mekim wankain na putim mani i go pas long ol projek bilong ol na bihain nesenel gavman i ken kam bihainim.

Mista Yawari i tok ol i gat nem bilong ol bris projek i stap pinis na ol

PNGDF soldia bai wok bihainim.

Em i tok amamas long dispela Yumi Yet Bris program na askim gavman long strongim dispela program i go het yet.

Mista Kapris i tok amamas long lukim Mista Yawari i mekim dispela pasin we ol arapela provinsel gavman i no mekim yet. Dispela em bikpela samting long lukim projek i kamap olsem na provinsel gavman i no wet tasol ol i go pas long putim mani long lukim dispela wok i kamap.

Mista Kapris tok Mista Yawari i no westim taim tasol em i strongim tok-tok pait bilong em long palamen long lukim gavman i kirapim ol dispela bris projek bilong provins bilong em olsem na emi go pas long putim mani.

Em i askim ol arapela provinsel gavman tu long mekim wankain pasin long lukim kain projek olsem i kamap long provins bilong ol.

Mista Kapris i tok bai ol i traim sanapim wanwan bris projek long wanwan ilektoret bilong Sauten Hailans provins na dispela em plen bilong gavman insait long dispela bris projek.

Komanda bilong PNGDF, Peter



• Mista Kapris (lephan) i givim ol sek mani i go long Komanda Ilau (rait). Mista Yawari (namel) i sanap lukluk. Foto: YAKAM KELO

Ilau, i tok ol enjiniering brens bilong ami long Igam Bareks long Lae, Morobe provins, bai i go pas long dispela wok bilong sanapim ol dispela bris long Sauten Hailans provins. Dispela bai namba wan taim bilong PNGDF long mekim dispela kain bris projek insait long kantri.

Komanda Ilau i tok dispela Yumi Yet Bris program bilong Mabey and Johnson em ol ami i save sanapim long Briten na Filipins na em i wanpela program we ol soldia bilong mipela i mas lainim na save long mekim kain bris we em i hap wok bilong ol soldia long sevim kantri.

Enga Porgera rot i bagarap nogut tru

ENGA Porgera rot i bagarap pinis na i nogat gutpela wok stretim i kamap long en. Gavana bilong Enga provins Peter Ipatas i askim Minista bilong Woks Gabriel Kapris sapos opis bilong em bai lukluk long dispela.

Mista Ipatas i tok dispela rot i kos K30 milien we Gavman bilong Australia i mekim aninit long sapot program bilong ol AusAID. Nau dispela rot i bagarap olgeta na i no gutpela long ol ka i ron long en na tu inap kamapim birua na bagarap long laip bilong ol pipel bilong dispela hap.

Dispela rot i go long Porgera Gol Main long Enga provins we Gavman bilong Australia i go pas long wokim na kamapim.

Mista Ipatas i tok sapos gavman i no laik stretim dispela rot o mekim wanpela samting long en orait ol i mas pasim dispela rot nau bikos dispela rot inap kamapim bagarap long

laip bilong ol pipel i stap long dispela hap na tu long ron bilong ol ka i go i kam long Porgera.

Mista Kapris i tok dispela rot i bin kamap we i nogat gutpela wok supavaisa o bos i kamap long en. I bin gat wanpela supavaisa we i save mekim wok na salim ripot i go bek long Mosbi long hetkota tasol na ol provinsel woks menesa bilong provins i no save stap klostu o wok bung wantaim em long mekim ol ripot na skelim ol wok long dispela rot.

Mista Kapris i tok dispela rot i no kamap gut bikos i nogat gutpela plening taim ol wokman i wokim dispela rot.

Em i tok dispela konsalten husat i mekim dispela ripot bilong em i no wok moa.

Olsem na em i tukluk long yusim arapela rot olsem Kredit Fesiliti Skim long tukluk insait long mekim hevi bilong dispela rot, em i tok.

NGO wantaim ragbi lig pait egensim AIDS

WANPELA non gavman ogenaiesen (NGO) wantaim Mt Hagen na Kurumul ragbi lig i kamapim pinis wanpela strongpela tingting long wok insait long hevi bilong pait egensim sik HIV AIDS insait long Western Hailans provins.

Tupela wokman bilong Foundation for Rural Development (FORD) Inc i bin kisim setifiket bilong 'Introduction to basic Facts and information on HIV/AIDS' we Nesenel AIDS Kaunsel i bin kamapim long Mt Hagen las wik.

Aninit long dispela kos ol i lainim eria bilong man na meri, pasin bilong meri na man i mekim pamuk pasin, ol sik nogut i save kalap long ol manmeri i mekim pamuk pasin raun, ol gutpela rot bilong bihainim na banisim gut skin na pasin bilong lukautim ol lain i gat HIV.

Dispela tupela ofisa Elizabeth Tuan na Victor Pokon bai bihain karim aut wok trening na ogenaiesen long ol ragbi lig klab long Mt Hagen na Kurumul Lig. Dispela tupela kompetisen i bikpela insait long provins.

Dispela projek i bin kamap namel long ol European Sexual health Poject, Nesenel AIDS Kaunsel, FORD Inc na Mt Hagen na Kurumul Ragbi Lig long WHP.



BANK OF PAPUA NEW GUINEA

PRESS RELEASE

KINA FACILITY RATE FOR MARCH 2005

The public is advised that based on the assessment

of key macroeconomic indicators available to the

Bank of Papua New Guinea, the Kina Facility Rate

(KFR) will remain unchanged at 7.00 percent for the

month of March 2005.

L. Wilson Kamit, CBE
Governor

Wok bung wantaim

OL MANMERI long Taikone setelmen long Mosbi i kamapim wanpela anti-kraim grup.

As toktok bilong anti-kraim em egen-sim kraim o raskol pasin.

Taikone Pis na Gud Oda Komiti i bin kamap las yia long pait egensim ol raskol pasin olsem stilim ol ka, mekim hombru na salim na smokim spak brus.

Bisnismen Wari Vele i bin go pas long kamapim dispela komiti na i bin givim K2000 long kamapim.

Long planti bilong ol manmeri husat i save stap long hap, dispela ples we pastaim planti raskol pasin i save kamap long en, i gutpela nau.

Esther Simon, meri hap Morobe na Sauten Hailans, i tok dispela program i kamapim planti gutpela senis kain olsem ol meri i ken wokabaut raun long nait nau na i no inap bungim wanpela raskol pasin.

James Tau, husat i gat 21 krismas, i tok ol yangpela man olsem em nau i gat sans long mekim ol narapela gutpela wok na i no mekim hombru o smok spak brus.

InterOil kirapim pait - Haiveta

GAVANA bilong Galp provins, Chris Haiveta, i sutim tok long kampani InterOil Limited, long kirapim ol pait namel long ol ples we i stapim ol driling o wok bilong painim wel long kamap long hap.

InterOil Limited em wanpela wel eksplorasen kampani o kampani we i save painim ol hap we em i ken kisim wel long en.

Mista Haiveta i bin tok long Kerema long Sande nait olsem InterOil i no bin paitim tok wantaim ol



• Haiveta.

provinse edministresen pastaim long ol i bin kisim ol masin bilong mekim wok

driling i go long ol rurel hap.

Em i tok i gat bilip olsem tripela manmeri i bin dai long ol pait namel long tupela ples.

Dispela pait i bin kirap long graun we InterOil i laik yusim long i go long ol hap em i laik painim wel long en, Mista Haiveta i tok.

"Dispela i no inap kamap sapos InterOil i bin mekim wanem mi bin tokim ol long mekim las Disemba.

"Long wanpela petroliem

na maining kibung, mi tokim InterOil olsem ol i mas go long ol dispela tupela provins we ol i laik wok long en, Sentral na Galp, na paitim tok wantaim ol lain husat i bai stap insait long dispela wok na kisim ol tingting bilong ol toktok na tok orait bilong ol.

"Ol i no mekim dispela na ol i kisim ol masin i kam insait na nau ol ples i pait na tripela manmeri i dai pinis," em i tok.

Hap Hap Nius

Helpim

Wanpela man bilong Galp provins i tok olsem planti manmeri i dai long hap bilong em long sik HIV AIDS na planti moa bai dai sapos ol provinzel lida na ol lain husat i ken helpim i no lukluk long dispela hevi. Planti lain long ples i tok dispela ol dai em pasin sanguma i kamapim tasol Mista Pou i bilip olsem ol dispela lain i bin dai long sik HIV AIDS.

Graun

Motu Koitabu Kaunsel husat i save makim ol Motu Koitabu manmeri bilong Nesenel Kapitel Distrik (NCD), i tok ol pipel bilong ol i mas kisim moa ol gutpela samting long graun bilong ol we kapitel i sanap long en. Ol kaunsel i tok ol i no wari long wok Nesenel Kapitel Distrik Komisen (NCDC) i wok long mekim long kamap provins. Ol i laikim tasol ol pipel bilong ol long sindaun gut.

Reip

Wanpela yangpela meri bilong Galp provins i bin kisim bagarap long han bilong 20 man long Mosbi las Trinde. Polis i tok 20 man i bin holim pasim na bagarapim o reipim dispela meri bihain long ol i bin putim naip long en na pulim em i go long ol liklik maunten long Gaden Hills, Hohola. Polis i bin kisim toksave na i go long dispela hap na holim pasim tupela bilong ol man husat i wok long mekim dispela pasin.



Pilai...Tupela ekta insait long wanpela pilai we i bin kamap long Mosbi Ats Tieta (MAT) las yia. MAT i wanpela gutpela hap long karim famili i go long lukim ol kain pilai olsem o lukim ol muvi o piksa. Foto: MAT

Raskol pasin kamap bikpela

WANPELA komyuniti lida insait long Is Kerema Lokel Level Gavman hap bilong Galp provins i autim wari bilong em olsem raskol pasin i wok long kamap bikpela long provins bikos long belhat long nogat gutpela wok gavanens o kaunsel.

Joe Fae, komiti memba bilong Hamu Hamu ples insait long dispela LLG (lokel level gavman) i tok long nesenel ileksen long 2002 i kam inap nau, i nogat wanpela gutpela toktok i go kam namel long LLG na ol grasrut.

"Olgeta manmeri i wok long painim rot long stap ol yet, i nogat wanpela gutpela kaikai i kamaut long ol toktok olsem ol provinzel na LLG rifom bai i karim gutpela guds na sevis i go long planti ol manmeri bilong kantri husat i stap long ol rurel hap.

"Mi ken lukim olsem Galp provins i no wok long senis na mi i no amamas long dispela," Mista Fae i tok.

Em i tok olsem wanpela ol bikpela samting we i helpim long kamapim dispela hevi em ol wod komiti i no save kisim sapot long kaunsel.

"Long 2002, ol wod komiti memba bilong ol 8-pela kaunsel wod we i save raunim ol ples bilong Hamu Hamu, Lelefiru, Kukipi, Isapeape, Mirivase, Lalapipi, Uritai, Lese, lokea na Sepoe, i no kisim wanpela mani long wok bilong ol olsem ol lain husat i save karimaut ol disisen na polisi bilong kaunsel.

"Taim yu askim ol long holim ol bung o kamapim ol komyuniti projek na wok, ol i les bikos ol i no kisim pe. Na ol i gat gutpela as long mekim dispela kain pasin," Mista Fae i tok.

NOW TRAVELLING TO...

LAE

Call in tomorrow and discover a whole new world of driving at...



Ela Motors
TOYOTA

Discover
THE ALL-NEW
HIACE

ON SHOW IN
LAE
TOMORROW

For More Information Contact: Ph 4781800 Glenn Wilson - Branch Manager or Tokana Hasavi - General Sales Manager

Ol meri
mas wok

Veronica Hatutasi
i raitim

GUTPELA piksa bilong ol meri long PNG, Dame Rose Kekedo, i bin dai long Fraide, Februari 28.

Praim Minista Sir Michael Somare taim em tok tenkyu long famili bilong leit Dame Rose i tok em (Dame Rose) i lusim bihain gutpela piksa long meri i mekim bikipela hatwok na kontribusen long kantri wantaim ol gutpela pasin bilong em long stretpela pasin, laikim na helpim narapela na yusim gut ol samting.

Sir Michael i tok tu olsem antap long bikipela kontribusen long edukesen na divelopmen bilong kantri, em bin sapotim na go pas long wok bilong ol meri i mas kisim wankain luksave olsem ol man long olgeta eria bilong wok divelopmen na laip.

Em i tok long eria bilong soim gutpela piksa long ol yangpela meri na strongim ol long kamap gut long laip em bikipela luksave i stap.

Minista bilong Foren Afeas, Sir Rabbie Namaliu, taim em i tok sori long dai bilong bikmeri i bin tok leit Dame Rose i bin mekim bikipela kontribusen long edukesen sistem long kantri.

Leit Dame Rose i bin kisim luksave long Kwin na kisim dispela bikipela namba long 1995 long kontribusen bilong em long Edukesen na Komyuniti.

"Mi kamapim planti bikipela samting long laip bilong mi tasol bikipela long ol em go pas long ol meri," leit Dame Rose i bin tok las yia long wanpela intevyu.

Long wanpela buk, ol i tok moto o tok stia bilong leit Dame Rose em "Equality and advancement for women" long PNG o long Tok Pisin, ol meri PNG i mas gat wankain luksave olsem ol man na ol i go fowet.

I moabeta ol yangpela meri i kisim gutpela skul long leit Dame Rose na mekim samting long go hetim laip na sindaun bilong ol.

Papa Milen Be na Mama Sentral na mekim ples bilong ol long Kokoda insait long Oro provins, leit Dame Rose i wanpela long ol 10-pela pikinini bilong Walter na Mary Kekedo.

Las wok em i bin holim em Projek Menesa long Kikori Ples Balus Ridelopmen Projek inap em i bin sik.

Famili bilong em i gat bikipela nem na kontribusen bilong ol long kantri em i bikipela.

Mama bilong em Mary i bin kisim namba long Kwin long 1987 long komyuniti wok na susa bilong em Jean husat nau i Hai Komisina long London i bin kisim Oda ov the Britis Empaia long Kwin long servis i go long Pablik servis.

Leit Dame Rose i wanpela "career" meri husat i wok hat long wok bilong em.

Em i no bin marit tasol lukautim ol famili na ol pikinini bilong ol brata na susa bilong em.

Sapotim ol rait bilong ol meri long wokples

Veronica Hatutasi i raitim

GAVMAN i mas putim i go insait long lo rait bilong ol meri long wokples, moa yet dispela i sut long materiiti liv o malolo ol meri i kisim long taim ol i go karim bebi, Presiden bilong PNG Treid Yunien Kongres (TUC) John Mahuk i bin tokim wanpela belotaim kaikai na bung long amamasim Intanesenel Wimens De long Crown Plaza long Mosbi long dispela wik.

Samting olsem 100 meri i makim gavman, praivet sekta na ol NGO (non gavman ogenaiesen) i bin bung long harim ol toktok long ol bikmanmeri, kaikai na toktok wantaim wanpela arapela long luksave long bikde bilong ol i bin pundaun long dispela wik Tunde, Mas 8.

Mista Mahuk i bin tok TUC bai mekim olgeta samting long lukim olsem ol meri i kisim gutpela lukaut long olgeta kain bagarap long wokples. Em i tok sampela kampani we i no momba bilong yunien i save wokim nogut tru long ol meri long sait bilong ol rait bilong ol.

Taim em bin givim luksave long Pablik Sevis na ol arapela kampani olsem Air Niugini na PNG Maritime Wokas i karamapim ol Stivido kampani na Ok Tedi Maining long givim hap pe long materiiti liv bilong ol, em i bin tok gavman i feil long putim dispela i go long agrimen na em i mas putim nau lo long lukautim ol meri long wokples insait long kantri.

Long nau yet, ol meri long praivet sekta i no save kisim materiiti liv pe.

Florence Willie, em Ligel Opisa bilong Employas Federesen bilong PNG, i bin tok lo bilong kantri i luksave long materiiti rait tasol samting tru em kisim pe o nogat long 6-pela wik bihain long meri i karim bebi.

Em i bin sapotim tok bilong Mista Mahuk na



• Sindaun harim ol toktok we ol spika i wokim. Foto: VERONICA HATUTASI

luksave long Pablik Sevis we i save peim ful materiiti liv pen a ol arapela liklik grup long peim hap pe taim praivet sekta em i nogat yet.

Em i bin tok ol meri i laik kisim materiiti liv i ken kisim tu liv pei bilong ol long wankain taim.

Mis Willie i bin tok long nau, situesen bilong ol meri i wok long go gut bikos moa meri i kisim gutpela skul, gutpela wok na dispela i strongim ol long kisim moa pawa, fridom long mekim disisen long ol samting long laip na sindaun bilong ol.

Deputi Seketeri bilong Leba na Emploimen, Evanella Kini, i bin putim salens long gavman long painim balens namel long ikonmik divelopmen, gutpela wokbung namel long ol wok bisnis, sosel na lukautim gut envaironmen we bai kamapim gutpela laip na sindaun bilong ol meri, yut na ol disebel lain.

Em i bin askim strong tu ol meri long lusim ol kain hevi namel long ol na wok wantaim long gutpela bihain taim bilong ol meri yet na ol pikinini.

Em i bin tok gavman i mas mekim samting long stretim ol dispela samting i sut long materiiti liv pe na ol arapela moa.

Lo bilong
lukautim ol
pikinini



Skruium tok long mak bilong
luksave long fisikel na imosenel abius

Malnutrisen o pikinini go bun nating, lusim pikinini wantaim nogat lukaut longpela taim, ol papamama i lusim pikinini is tap em yet, slip long taim bilong skul.

Narapela we i save kamap, moa yet long ovasis em long mama i giaman na fosim pikinini o tok bebi i sik na bai kisim em i go long dokta o kisim ol kain marasin.

Sampela taim tu, ol pikinini, moa yet ol meri bai giaman sik long kisim luksave. Dispela em taim papamama i no bisi long ol.

Sapos yu lukim dispela samting i kamap, i moabeta yu ripotim i go long ol ogenaiesen we i save lukautim ol pikinini olsem welfea, polis na ol lain we kontek bilong ol is tap daunbilo.

Sapos yu laik save moa long dispela lo na ol arapela samting i sut long famili, meri na pikinini hevi, go long ol dispela lain:

Ringim PACE (People Against Child Exploitation) PNG long Telipon Namba 3203375 o 3203376. Salim feks long 3214738 o yu ken rait i kam long ol long PO Box 5872, Boroko, NCD. Yu ken kisim ol tu long email etres: hausruth@hotmail.net.pg

Narapela em long UNICEF opis long Pot Mosbi. Ringim ol long telipon namba 321300. Yu ken rait long ol long dispela etres: UNICEF, PO Box 472, Port Moresby, PNG.

Narapela em long Family's Sexual Violence Action Committee. Yu ken kisim ol long telipon namba 3211714 o 320328 o salim feks long 3217223 o email:pngtvac@daltron.com.pg.

Sotpela Tok Lukaut:

Skruium tok long obesiti o
fatpela abrusim mak

Long daunim weit o putim moa fat abrusim ol dispela samting: Dring long skel tasol, noken ovarim mak bilong wok, wari samting, pasin bilong stap nating na i no wokim samting, noken kaimaim ol kaikai i no gutpela long bodi na wokim eksasais long 30 minit olgeta de. Yu ken wokim dispela taim yu wokabaut, go antap long steps na abrusim ol kaikai i gat planti suga na gris.

Moa long neks wik.

Raun lukim ol meri na pikinini long PNG



• Ol pikinini Morata long Mosbi i redi long amamas. Foto: BARBARA TOMI



• Bung amamas long Kainantu, Isten Hailans. Foto: SR ZELIA SSPS



• Amamasim greduesen bilong ol mama long somap skul long Wimens Tekstail Trening Senta, Gordons, Mosbi. Foto: MAISAN PAHUN



• Ol dispela pikinini na meri i givim stret long wokim danis bilong ol Buka long wankain amamas olsem dispela long lephan. Foto: MAISAN PAHUN



Kuk Kona
wantaim
MERI WANTOK

Banana Pie

Yu mas i gat:

Basic Short Crust Pastry

4-pela slais grin banana

Juis o wara bilong wanpela lemon (o tupela laim) . wantaim kwata kap painapel juis

Haf kap suga

1-pela tispun sinamon

2-pela tispun flaua

2-pela tispun bata

We long Kukim:

1-Sokim o larim banana long juis namel long 20 na 30 minit.

2-karamapim as bilong pai trei wantaim pestri

3-Putim banana

long pai trei (i no wantaim marined)

4-Miksim suga, sinamon na falua na kapsaitim antap long ol banana.

5-Kapsaitim 3-pela tispun juis antap na lainim ol liklik hap bata long en.

6-Karamapim wantaim top kras (crust) we yu katim ol liklik slit long ol. (pestri)

7-Pasim wantaim foil na beikim inap long 30 minit o haf awa o inap e mi tanim i go braun.

8-Sevim taim em i wom o i no hot o kol tasol is tap long namel wantaim ais krim.

TOKTOK NATING
Wantaim
Fr. Paul Liwun SVD



PLANTli bilong yumi i bin lukim planti muvi. Planti muvi i gat planti skul yumi bai lainim long en. Sampela taim skul muvi save helpim yumi long stretim hevi bilong marit, yut, famili na planti moa, tasol sampela muvi i save givim yumi bel isi long yumi. Mi ken tok olsem planti muvi i olsem glas bilong lukim pes bilong yumi.

I gat wampela olpela muvi ol i kolim; "Butterflies are free". Dispela em i stori bilong wampela alpas man, nem bilong em Don Baker. Olsem wampela alpas man em i stap long wampela rum long wampela flet. Maski em i alpas, tasol em i gat save long raitim planti singsing long sapotim laip bilong em. I gat narapela eka long dispela muvi, em i wampela yangpela na naispela meri - nem bilong em Jill Tanner. Em i bin marit bipo tasol nau em i lusim man na stap olsem singel meri. Em i no laik kamap pren wantaim ol narapela man gen, bikos nogut hevi bilong marit em bai bungim gen.

Tasol taim em i bungim Don Baker na tupela i kamap gupela pren, Don i bin askim em long maritim em. Tasol Jill i tok nogat bikos nogut em i pilim bel hevi gen long marit laip. Long klaim tingting bilong Jill, Don i tokim em olsem maski em i gat ai long lukim, tasol i no em o Don i stap olsem alpas. Don i tok olsem bikos Jill i pret long marit gen. Gupela toktok bilong Don i bin mekim bel bilong Jill i kamap gut na bihain tupela i marit na kamapim gupela famili.

Kalenda bilong Lotu Katolik bilong las Sande i stori bilong Jisas i mekim orait ai bilong wampela alpas man. Em i wampela gupela hap bilong gutnius long helpim yumi long lukluk insait long yumi yet. Long dispela hap bilong gutnius (Jon 9 1-41); yumi painim aut olsem, i gat tupela grup alpas i stap. Namba wan grup - em ol lain i no inap lukim bikos ai bilong ol i pas. Tasol insait long bel bilong ol, i gat strongpela laik tru long lukim. Namba tu grup em ol manmeri i gat gupela ai i stap, tasol i no laik long yusim ai bilong ol gut long lukluk. Olsem na Jisas i tok: "Ol i gat ai, tasol ol i no inap long lukim".

Ol namba tu grup I NO LAIK long lukluk, bikos i gat strongpela ANTAP PASIN i stap insait long bel bilong ol. Ol i tingim ol i save olgeta samting pinis, olsem na ol i no laikim narapela helpim. Dispela kain pasin em i stap strong insait long famili na komyuniti bilong yumi. Long pastoral wok bilong mi olsem Pater, mi bin bungim planti kain man olsem. Sampela taim ol i tingim ol i bin kisim planti skul pinis, olsem na ol i tingim ol i save olgeta samting pinis.

Ol i tingim ol i gat bikipela nem long lain, komyuniti, o grup bilong ol olsem na ol i no nidim helpim o stia tok bilong narapela. Sampela marit manmeri i gat hevi long marit bilong ol, tasol ol i no laik painim narapela manmeri long kisim helpi. Ol i ting ol yet inap long stretim.

Tasol taim ol yet i stretim bihainim save bilong ol yet, sampela taim ol i no stretim hevi, tasol ol i kamapim bikipela moa problem bilong ol yet. Na planti moa spiritual alpas i stap long laip.

Gutnius bilong alpas man i skulim yumi long DAUN PASIN - redi long luksave long ol rong bilong yumi, limitesen (o ol samting we yumi ino inap long mekim) bilong yumi na redi long opim na kisim helpim bilong ol narapela manmeri. Yumi nidim moa skul long - self-acceptance - (o luksave long yumi yet na wanem samting yumi gat long en). Akseptim wiknes na strong bilong yumi. Akseptim save bilong ol narapela manmeri. Akseptim wiknes bilong ol narapela manmeri tu.

Plis tingim tu Baibel Sosaiti long baset

Veronica Hatutasi i raitim

OL BIKPELA Kristen Sios long kantri i kisim askim long tingting long Baibel Sosaiti long anuel baset o mani plen bilong ol.

Siaman bilong Baibel Sosaiti na wampela bikipela loya long kantri, Loani Henao, i bin wokim dispela toktok long dispela wik insait long 30 yia selebresen bilong Baibel Sosaiti Haus long Koki, Nesenel Kapitel Distrik (NCD).

Program bilong dedikesen o putim i go gen long han bilong God dispela Baibel Sosaiti Haus long gupela lukaut bilong em na em i helpim long mekim wok bilong Bikipela long 30 krismas i bin stat long moning na pinis long apinun long Tunde, Mas 8.

Ol yut na meri grup bilong Kila Kila Yunaitet Sios i bin putim kamap ol tum-buna na lotu singsing, Ela Kwaia bilong Ela Yunaitet Sios i bin putim ol singsing kwaia na Wantok Radio Lait i bin karimaut laip brotkas long dedikesen sevis.

Mista Henao i tok insait long 30 yia, Baibel Haus i bin givim sevis long kisim wok aweanes i go long ol Kristen na ol sios long Baibel Sosaiti na ol wok em i

mekim long en.

Bikipela wok bilong Sosaiti em bilong tanim, pablim na tilim ol Buk Baibel. Baibel Sosaiti i mekim dispela wok wantaim helpim bilong Sama Institut ov Linguistiks (SIL) long Goroka, Baibel Trenslesen Sevis na Baibel Sosaiti.

Wampela piksa long wok we Sosaiti i mekim long helpim Baibel i go stret long pipel na ol i ken klia em long Huli Baibel we i kamap pinis long tokples bilong ol.

Mista Henao i tok ol pipel bilong Huli insait long Sauten Hailans i gat nau Buk Baibel i kamapim Olpela na Nupela Testamen long tokples bilong ol yet.

Na em i tok dispela em i namba wan taim tu long Baibel we ol i tanim tupela buk long tokples na antap long en, Katolik Sios i bin helpim long mekim dispela wok.

Ol narapela tokples we ol i wok long tanim Buk Baibel em long Tokples Pa bilong ol Kogodala pipel long Westen provins, glasim gen Motu Baibel, Hula na Milen Be Baibel.

Baibel Sosaiti i gat 21 kaunsel memba i kam long ol meinlain Kristen Sios olsem Katolik, Luteran, Yunaitet, Angliken, Salvesen Ami Sios na Evanjelikel Alaiens

Sios.

Mista Henao i tok Buk Baibel em tok we i stap laip na i no olsem ol arapela buk we ol toktok i lus bihainim taim.

"Olgeta samting we i karamapim marasin, saiens, lo, samting i stap long ples hait na pablik em i stap long Buk Baibel.

"Ol lo we man i mekim i ken gat asua tasol lo bilong God i stap long Baibel we yumi bilip long em bihainim Jisas em i tok tru na karamapim olgeta pipel, long wankain mak, " Mista Henao it ok.

Em i tok tanim Baibel i go long tokples em helpim stret ol pipel long save long Tok bilong Bikipela long komyuniti, famili na sosaiti.

Long helpim dispela wok, Mista Henao i bin autim tingting olsem i gupela long ol Kristen sios sapos ol i ken tingim Baibel Sosaiti taim i wokim baset bilong ol insait long wampela yia na katim liklik hap mani long helpim Sosaiti.

Em i tok wok wantaim Baibel Sosaiti i gat salens bikos yu bai ino inap kisim ol samting bilong graun olsem alauwens samting tasol em i sevis we wampela i givim i go long Bikipela.



Kalabus Stretim Banis...Ol lain kalabus long Boram Wewak, Is Sepik provins, i save mekim kainkain pablik wok. Long dispela wik, ol i helpim ol Rosary Sister long Wewak Katolik Daiosis long stretim banis bilong ol. Sister Madeline bilong Rosary Sister oda i tok tenkyu long ol. Foto: BIG JOE SVD



TINGIM Bikipela na bihainim pasin bilong em em bikipela toktok we Katolik Bisop bilong Simbu Daiosis Bisop Henk Maarssen svd i bin autim long skul bilong em Long Sen Mary's Peris long Goroka, Isten Hailans.

Em bin tok yumi ol Kristen manmeri mas pre olsem Pikinini bilong em yet i skulim yumi na tu, helpim ol manmeri na famili husat i stap long hevi.

Long dispela taim bilong Lent, em i taim bilong lukluk bek na stretim pasin nogut bilong yumi, Bisop Henk i bin tok.

- Theodorus Tulasi



"I no gat wampela samting inap pasim laik bilong God"

Olsem na bai yumi tok wanem long dispela ol samting God i mekim? Sapos God i helpim yumi, orait husat bai i birua long yumi? God i no bin pasim Pikinini bilong em yet. Nogat. Em i bin salim em i kam bilong helpim yumi olgeta. Na sapos em i givim Pikinini bilong em yet, orait ating em bai i givim yumi olgeta arapela samting tu. God i bin makim yumi bilong em yet, olsem na husat bai i kotim yumi? Nogat. God yet i save kolim yumi stretpela man. Husat bai i tok long yumi mas kisim pe nogut bilong sin? Nogat. Krai Jisas i bin dai, na em i save askim God long helpim yumi, na i no gat wampela samting inap pasim dispela laik bilong en i kamap long yumi wan wan. Sapos hevi i kamap long yumi, ating dispela ol kain samting bai inap pasim laik bilong Krai? Nogat tru.

Rom 8: 31-36

Grasrut man luksave long hanmak bilong Krai

Paulus Tali i raitim

EM i nogat wampela save long lukim buk o rit na rait tasol nau John-Ronnie Robert bilong Asaro long boda bilong Isten Hailans na Madang provins i lainim wantaim helpim bilong sios na em i kamap olsem katekis bilong Katolik sios.

Long 1970 em i bihainim skul bilong Katolik misin na tu em i kisim stia tok tu long wok isi isi long go bihainim wok bilong sios stret.

Wampela taim long 1981 em i kisim driman long ritim baibel long kisim gupela tingting long helpim em. Robert i kisim wampela Wantok Niuspepa na em i traime isi long ritim na i no long-taim bihainim em i lainim em yet long ritim tok pinsin.

Em i save lukim tu ol pasto na ol pater bilong sios na em i save i gat tingting long kamap kain man olsem wampela bilong ol.

I no long taim Mista Robert i kamap olsem paris kaunsel na tu draiva bilong kisim ol Katolik sista na pater i go i kam long mekim wok bilong ol long 1984.

Tasol long 2003 bikipela sik i bin kisim Mista Robert na klostu em i dai. "Olgeta skin bilong mi i lus na mi slip long ICU wod long Pot Mosbi Jenerel Haus Sik, Mista Robert i tok.

"Dispela taim mi sik planti ol narapela husat ol i sik tu i bin dai tasol mi stap laip yet," em i tok.

Mista Robert i tok taim em i slip long haus sik em i lukim



• Mista Robert.

olgeta senis i kamap long laip bilong em na em i tok tenkyu i go long papa God na Holi Spirit long lukautim em na kisim em i kam bek orait gen.

"Mi man nogut, mi nogat save long rit na rait tasol mi luksave long planti han mak bilong Krai.


"Em long lukaut bilong Krai yet mi kisim bikipela wok nau

olsem katekis bilong Katolik sios long Waigani," em i tok.

Mista Robert i save tisim tu ol gret 7 na 8 sumatin bilong ol skul long Waigani insait long Pot Mosbi yet.

"Dispela wok inap long ol saveman i mekim tasol mi mekim olsem na mi salensim ol yangpela nau long go het na mekim wok olsem nau mi mekim na noken bihainim ol bikhet pasin nabaut," Mista Robert i tok.

Mista Robert i tok liklik mani ol katekis i save kisim long olgeta mun long lukautim ol tasol em i tokim pater olsem em i amamas tasol long wok nating bilong wanem em i wok bilong God tasol pater i tokim em long kisim liklik man olgeta mun bai i ken helpim em na tu lukautim famili bilong em.



Planti mani bin raun long distrik

Las wik mi bin tok olsem wanpela samting i bikpela long yumi nau em mani. Sapos yumi gat mani bai yu gat kaikai na klos long haus. Sapos yumi gat mani bai yumi kalap long PMV kar o kism balus i go long ples yumi laik go long en.

Planti mani i save raun long taun bikos i gat planti kampani i ronim bisnis na ol gavman opis i stap. Ol wok manmeri tu i wok na kism pe long fotnait.

Ol tisa, dokta boi, ol nes na ol narapela wokmeri long ol rurel eria i save ron i go long taun long kism mani long benk na baim ol klos na kaikai.

Nau Nesenel Gavman i traim long pulim sampela bilong ol dispela mani long taun na siti i go long ol manmeri long ol distrik na long ol ples. Gavman i stat pinis long putim ol Treseri Opis. Dispela ol Treseri



TOK PISIN
wantaim
PETER MAIME

Opis bai wok ananit long Dipatmen bilong Fainens.

Ol Distrik Treseri Opis bai prinim ol sek na tu bai i gat mani bilong peim ol gavman wok manmeri. Tu Treseri Opis i ken peim ol lain i mekim wok kontrak long distrik level.

Nesenel Gavman tu i bin sainim agri-men pinis wantaim Benk Saut Pasifik na Post PNG. Ananit long dispela agrimen, benk na pos ofis bai stap wantaim Treseri Opis long ol distrik.

Taim dispela tripela sevis i stap bai planti mani i raun long distrik. Ol gavman wok manmeri bai kism pei long distrik yet. Ol lain long ples, husat pikinini bilong ol i wok long ol narapela taun o siti na salim mani, ol papa na mama i ken kism long ol distrik hetkwata bilong ol.

Taim mani i raun long ol distrik, ol manmeri husat i maketim ol kaikai bilong gaden, ol abus bilong bus na solwara bai gat sans long mekim sampela mani.

Ol i ken yusim ol mani ol i kism long maket long baim sampela gupela kaikai, klos na bilong ol skul fi.

Ol provins i gat ol Treseri Opis pinis em Morobe, Isten Hailans na Sentral Provins. Taim ol narapela provins i redi bai ol i kism tu.

God i makim yu long kamap lida bilong pipel

BAIBEL i kolim kristen lida olsem bosboi. Long taim bilong Nupela Testamen bosboi i gat wok bilong lukautim ol samting long haus bilong bosman. Bosboi i save baim kaikai, lukautim kolos bilong ol pikinini

bilong bosman na salim ol arapela samting long haus bilong bosman.

Bipo Josep i gat dispela kain wok long haus bilong Potifa long Isip

Yumi ken save bosboi i gat bikpela wok tru. Bosman i putim olgeta samting bilong em long



Ol prinsipol bilong gupela lida
wantaim
Pastor na Evangelist
OHARE JABERE

han bilong bosboi na bosboi i mas lukautim gut.

Wok bilong bosboi em Pol i raitim dispela kain tok bilong makim wok bilong lida God i bin givim em.

Nau tu long sios, ol kristen lida i gat wok bilong lukautim wok bilong God. Long 1 Korin 4:1-5, Pol i tok long tupela samting bosboi i mas mekim namba wan i olsem em i mas lukautim gut wok bilong em.

Tu em i mas mekim wok i go stret olgeta na bihainim gut tok bilong bosman. Haus i bilong bosman na i no bilong em.

Olsem na em i mas mekim ol samting bosman i tokim em long mekim. Na sapos sampela man i tok, em i mekim gupela wok o sapos ol i krosim em, em i no ken harim tok bilong ol. Nogat.

Em i mas harim tok bilong Bosman tru

bilong em, em God yet (1 Korin 4:3-5).

Sapos God i givim yumi dispela wok bosboi, orait yumi noken litimapim nem bilong yumi yet na kamap bikhet. 1 Korin 4:7 i tok long yumi no bin kism wanpela samting long arapela man.

Yumi kism long God tasol. Olsem na yumi noken litimapim nem bilong yumi yet.

Ol i noken ting dispela wok i rabis wok tasol. Nogat. Em i no samting nating long ai bilong God. Olsem na ol kristen lida i mas tingting stret.

Long ai bilong God yet ol i no samting nating tasol ol i noken litimapim nem bilong ol yet.

Taim God i skelim pasin bilong ol manmeri, em bai i glasim gut tru wok bilong yumi ol man i gat wok long skulim ol manmeri. Olsem na yumi lida i gat bikpela wok bilong

skulim ol manmeri. Olsem na lida i noken ting long mekim wok tasol.

Nogat, em i mas ting long mekim gupela wok bai ol arapela lida i ken kamap strongpela na wok wantaim.

Lida bai i wok long kirapim manmeri long mekim gupela wok wantaim presen bilong Holi Spirit.

Dispela pasin bilong kirapim ol arapela manmeri long mekim em gupela pasin na em pasin bilong God Bikpela bilong yumi.

Pasin bilong mekim wok bilong helpim ol arapela man em i bikpela tok long Baibel.

Dispela pasin em i bihainim pasin bilong Jisas Kraist. Em yet i God tru, tasol em i no ting long holim pas dispela pasin bilong i stap wankain olsem God.

Nogat em i lusim dispela pasin na i kamap man na i kism pasin olsem wokboi nating.

Ol man i lukim em i stap man tru na daunim em yet na i bihainim pasin bilong God inap long em i dai long diwai kros.

WANTOK KOMENTRI

Graun i bikpela samting long Manam pipel

Yumi tingim ol pipel bilong Manam allan husat i kism bagarap long paia bilong maunten long las yia. Olsem na planti pipel i wok long givim han na helpim yet.

Bikpela lukluk na skelim nau em sindaun bilong ol bai gupela o nogat. Bai ol i amamas long wanem samting ol i kism na stap long en o nogat?

Bikpela luksave nau em ol liklik pikinini i mas kism gupela edukesen o skul long lukautim na sapotim sindaun bilong ol long bihain taim.

"Taim yu sanap strong antap long graun bilong yumi stret, bai yu nogat wari. Yu ken sanapim haus na mekim gaden na ol pikinini bai i ron i go i kam gut na amamas long go long skul na kaikai gut."

Tasol dispela gupela sindaun long bihain taim bai kamap sapos ol i kism gupela skul long nau.

Sapos klasrum i kamap, ol i skul long hap we ol i no inap kirap surik i go gen long narapela hap graun gen.

Sapos ol i kirap go gen, kain sevis bilong edukesen bai i no inap kism gut ol pikinini na skul bilong ol bai bagarap na bihain taim bilong ol tu i no inap strong long sapotim ol yet na ol arapela brata susa na pipel bilong ol.

Taim yu sanap strong antap long graun bilong yumi stret, bai yu nogat wari. Yu ken sanapim haus na mekim gaden na ol pikinini bai i ron i go i kam gut na amamas long go long skul na kaikai gut.

Dispela em bikpela samting olgeta level bilong gavman i mas skelim na helpim ol pipel nau. Sapos ol pipel i go sindaun long wanpela graun bilong gavman em bai orait.

Tasol bai dispela hap graun bai bikpela inap long ol pipel i ken go raun long bus na mekim gaden na painim abus o nogat. Bai dispela graun i harim toktok bilong ol na ol kaikai bai kamap gut o nogat?

Dispela em kastom pasin bilong yumi. Wanpela tingting tasol em sapos gavman i givim wanpela hap graun long ol pipel i sindaun long en em orait tasol gavman i mas givim ol tupela sip samting bilong karim ol pipel i go bek long Manam allan bilong mekim wok gaden tasol na painim abus na kam bek long nupela hap ol istap long en.

Moabeta ol lida bilong Madang i skelim sampela tingting olsem pastaim. Bikos ol pikinini bai i go planti na ol i mas gat gaden bilong kaikai.

Ol i mas pilim olsem ol i gat graun bilong tumbuna i stap we ol bai kism strong long en. Long dispela rot, ating ol pikinini bai sindaun gut long skul long hap ol i stap long en na winim gut skul bilong ol long wanpela hap tasol.

Ol i noken surik surik i go long narapela hap bikos i nogat kaikai na ol rot bilong sapotim ol yet.

Graun em bikpela samting long laip na sindaun bilong yumi ol pipel bilong Papua Niugini.

Yumi yet i save papa long ol graun bilong yumi na sapos wanpela samting i laik kamap long graun bilong yumi, hariap tru bai yumi mas mekim nois long maus o eksen.

Olsem na ol lida bilong yumi i mas skelim gut laip na sindaun bilong ol pipel bilong Manam long nau na bihain taim na glasim gut graun we bai ol pipel i ken kism strong long en na nogat man o meri bai toktok egensim ol.

WANTOK

Published Weekly, Wednesday, for Word Publishing Company, Ltd.

P.O. Box 1982, Boroko, NCD

Papua New Guinea

Telephone: 325 2500

Fax: 325 2579

Email: word@global.net.pg

Pe bilong wanpela yia
52 niuspepa

Ples:	Air:
PNG	K140.00
AUSTRALIA	US\$100.00
ASIA PACIFIC na JAPAN	US\$80.00
AMERICA na EUROPE	US\$150.00

General Manager
Justin Hansu Kili

Editor
Yakam Kelo

Published by Jeremy Burgess and printed by Pacific Star P.O. Box 6817 Boroko NCD at allotment 13 section 38 Waigani drive, Port Moresby

Word Publishing Company Limited is owned by the four major churches of Papua New Guinea: Catholics 50%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Drum Drum karim nem bilong PNG

William Natera i raitim

TAIM ol biknem musik atis bilong PNG i wok long opim dispela yia wantaim ol nupela albam na singsing, wanpela grup long ol yangpela PNG atis i wok long mekim nem bilong ol wantaim wanpela bikpela konset long Sydney Opera House long Australia.

Dispela grup em Drum Drum.

Dispela so bilong ol i bin soim tru strong bilong Drum Drum olsem wanpela musik grup i gat strong long tumbuna musik wantaim nupela stail musik bilong tude.

Drum Drum i bin kamap long tingting bilong wanpela yangpela musik atis bilong Australia na Papua Niugini, nem bilong em Airi Ingram husat i save stap long Darwin, Australia.

Na i kam inap long tete, Drum Drum i pilai pinis long ol bikpela ples long wol olsem Golden Jubilee selebren bilong Queen Elizabeth II long London, Inglan.

Namel long taim ol i save raun na pilai nabaut long wol, ol i save go pilai long ol WOMAD wol konset we biknem musik atis Peter Gabriel i save kamapim aninit long rekod nem bilong em 'Real World'.

Airi i tok konset bilong ol long Sydney Opera Haus em i wanpela bikpela samting tru.

"Em i wanpela bikpela samting tru long mipela bilong wanem mipela i bin wok hat tru long mekim nem long Australia. Mipela i wok long mekim nem long ovasis na i winim ken nem bilong mipela hia long Australia.

"Long tingting bilong mi yet, ating sampela festival i save kamap long Australia i no save laik sapotim ol musik grup i nogat nem bilong ol. Bihain long mipela i mekim sampela bikpela konset long Europe na ol manmeri long hia i luksave long mipela.

"Dispela konset long Sydney Opera House em i bikpela samting bilong mipela na bai i strongim tu PNG musik," Airi i tok.



• Drum Drum long wanpela konset bilong ol las yia. Foto: Drum Drum

I no namba wan taim bilong Drum Drum long pilai long Sydney Opera House. Long 2000 ol i bin pilai long makim Coroboree 200 so. Long dispela taim ol i bin pilai wantaim ol biknem musik atis bilong PNG olsem Markham Galut, Patti Doi, Richard Mugu na Ben Hakalitz. Tasol dispela so ol i pilai long en i bin 10 minit tasol.

Nau Drum Drum bai go long New Zealand bilong pilai long WOMAD New Zealand. Dispela em i bikpela so tru long insait long Pasifik. Bihain long ol i pinis long New Zealand, bai ol i go olgeta long Amerika long wanpela bikpela 5-wik raun we ol bai pilai long Philadelphia, New York, Chicago, Detroit na Los Angeles. Dispela pilai raun bilong ol bai winim olgeta arapela so bilong ol.

I gat sampela projek tu i stap yet we Drum Drum bai mekim. Ol bai mekim musik bilong wanpela piksa bilong ol dolpin long Byron Bay, ol i lukluk tu long opening seremoni bilong Arafura Gems long Darwin, wanpela 6 wik raun long Westen Australia pastaim long ol i go long Italy na bihain long en bai ol i kam bek long PNG long rekodim nupela albam bilong ol long mun Septemba.

"Sans bilong pilai raun long wol em i wanpela bikpela ekspirians na mipela i amamas tru long gat dispela sans long raun wantaim musik bilong mipela.

"Pius Wasi (man i kamapim Tambaran Culture) i tok olsem tiket bilong yu long wol i stap wantaim garamut na kundu, na mi ken tokim yu olsem dispela em i wanpela tru tru toktok. Bilong wanem mipela i no karim garamut na kundu go raun long wol. Ol i kisim mipela i go.

"Na mi save olsem kalsa na ol pasin tumbuna i ken mekim wankain, maski yu stap long kain kain wok. I no bilong musik tasol. Yu mas tingting gut na bihainim," Airi i tok.

Raun long wol i opim ai bilong Drum Drum na i opim rot long ol i bungim sampela biknem manmeri olsem Kevin Locke long

2003 long Soux resevesen o ples we ol as ples India manmeri bilong Amerika i sindaun long en. Long dispela hap ol i bin mekim wanpela muvi piksa ol i kolim Dacing with Wolves. Ol i bin bungim Sami pipel bilong Norway we san i no save go daun. Na rekodim musik wantaim biknem drama bilong Esia, Lewis Pragasam na ben bilong em Asia Beat.

"Olgeta dispela lain manmeri mi bungim i bin laik save moa long PNG na mi laik bilip olsem ol liklik nem mipela i mekim long ovasis inap long opim dua na bai i stap op bilong ol arapela PNG musik atis long yusim long strongim musik bilong ol," Airi i tok.

Driman bilong en em bilong sanapim wanpela ogenaiesen we bai i ken wok long promotim indipenden PNG musik long intansenel maket. Bikpela as tingting bilong Airi em long yusim ol save manmeri Drum Drum i bungim long helpim ol arapela PNG atis long putim musik bilong ol long wol maket.

Airi i tok: "em i bikpela samting long musik long kamap insait long komyuniti bilong em yet, tasol mi ting em i bikpela samting tu long wol i mas harim nek bilong ol PNG musik atis. Em i wanpela gutpela tingting we wol i no klia long en yet, tasol ol i redi tasol long putim iau. Mi ken tok olsem ol manmeri nabaut long wol i gat bikpela laik long PNG musik, bilong wanem em i nupela samting na i save kirapim skin bilong ol.

"I no musik tasol. Toktok musik i save karim em samting ol manmeri i save laikim tumas. Ol manmeri i save amamas long harim stori bilong ol arapela manmeri na nupela lukluk na tingting long laip na famili we ol i mas pilim na tingim olsem wanpela man o meri, olsem ol famili, na olsem wanpela kantri i ken helpim planti ol arapela manmeri nabaut long wol.

"Olsem na yumi yet long PNG i noken lusim tingting long strong bilong kalsa na tumbuna pasin bilong yumi. Musik bilong ol tumbuna bilong yumi no indai yet.



CHM
toktok
wantaim
Mangrove
Studios



• **JK na Alain LeCante - Bosman bilong Mangrove Studios i lukluk long ol CD bilong Vanessa Quai na Apprentice ben bilong Solomon Ailans.** Foto: NICKY BERNARD

na em i bin wok bung wantaim Pacific Gold Studios pastaim we em i karim musik bilong Edou, Mexem na ol arapela olsem Vanessa Quai husat i bin laik rekodim wanpela albam hia long PNG.

"Long dispela taim, mi pilim olsem PGS i no bin i gat tingting long bihainim nupela rot long musik," Alain i tok. "Tasol sans i kamap taim PGS i pas na mi wok wantaim Raymond Chin."

Alain i wok long kam long PNG inap 7-pela yia nau bilong glasim gut PNG musik, em i save laikim tru mambu musik bilong Bogenvil na Madang na 4-pela yia i go pinis, em i sanapim wanpela mobail studio long Hutjena Hai Skul, Buka long rekodim ol mambu ben long hap we ol i bin putim long wanpela CD.

"I gat moa musik vidio klip i save kamaut long PNG na em i winim olgeta arapela kantri insait long Pasifik. Mangrove Studios i save mekim ol vidio klip, tasol i no inap winim namba bilong ol vidio klip Mista Chin i wok long mekim insait long dispela kantri."

Mangrove na CHM i wok long toktok long painim wanpela distributa long Australia na long kamap memba bilong APRA.

Alain i autim tingting bilong em long i nogat wanpela kopirait sosaiti insait long PNG na ol musik atis nau i nogat strong.

"Kantri bilong yu i mas i gat wanpela sosaiti we bai i ken karimaut ol aweanes program bai ol musik atis i klia long ol rait bilong ol na strong bilong ol long kisim gut mani bilong musik bilong ol," Alain i tok. "Ol bai bel isi sapos ol i kisim gut mani bilong ol."

YES, i klia nau. Chin H Meen i wok long patim toktok wantaim Mangrove Studios bilong New Caledonia long wok bung bilong opim musik i go aut long Pasifik.

Dispela tupela lain em ol bikpela distributa bilong musik insait long Pasifik rijon na sapos tupela i bung wantaim bai em i helpim tru ol musik atis bilong Pasifik.

"CHM Supersounds studios i wok long kamap wanpela bikpela nem insait long musik bisnis insait long ol Melanesia kantri," Alain LeCante, bosman bilong Mangrove Studios i tokim Wantok Niuspepa las wik long Pot Mosbi. "Na sapos mipela i bung wantaim, em bai karim bikpela kaikai bilong ol musik atis hia na long arapela Pasifik kantri."

Alain LeCante em bilong France na em i Eksekutiv Produsa bilong Mangrove Studios long Noumea, kapitel bilong New Caledonia. Em i save rekodim musik long Fiji, Vanuatu, Solomon Islands na Papua Niugini.

Nau em i lukluk long distribut i go long Australia na New Zealand tu.

Alain i bin kam long Mosbi long toktok wantaim Raymond Chin, papa bilong PNG rekodet musik long kamapim wanpela wok bung bai ol i ken distributim musik i go long ol maket long Australia na New Zealand.

"Mipela i gat wanpela agrimen pinis we CHM i save soim ol musik vidio klip bilong Mangrove long EMTV na mi kam long sapotim Mista Chin na wok em i mekim long ol vidio prodaksen," Alain i tok. "Mi yet mi ting olsem Mista Chin i save mekim gutpela wok long promotim PNG na Pasifik musik long TV."

Mi bin toktok wantaim Alain long sampela yia i go pinis long tingting bilong em long kam long PNG. Tasol em i bin luksave olsem PNG maket em bilong CHM. Olsem



• **Kukim Tolai Rok**

Em nau, ol brata yet ya Leonard na Uralom Kania i go pas long singsing wantaim Jnr Kopex long namba wan CHM Video Hits Live musik konset i kamap las wiken long Pot Mosbi. Dispela wiken bai lukim ol manki Morobe O'shen na Dadii Gii i soim stail bilong ol. Foto: NEVILLE CHOI



• **Biknem tu ya!** Yumi long PNG i gat ol biknem lain tu. Long sait bilong radio, nem bilong Kastee na Vaviese i bikpela tumas. Dispela yangpela man i indai kirap long bungim dispela tupela lain na em i askim ol long sainim nem bilong ol. Foto: NEVILLE CHOI



PASIFIK NIUS

Noken kolim nem bilong reipis

NU SILAN, AUCKLAND - KOT i tok orait pinis long noken raitim o tokaut long nem bilong ol ol lain Pitcairn ailan we i nau stap long kot. Ol dispela lain i stap long kot bikos long ol i kamapim pasin pamuk wantaim ol liklik meri.

Shawn Christian 29 husat i bin stap long Australia long 1998 inap nau i sanap long kot long tripela sas bilong reip i nau stap long Nu Silan long sanap long kot. Gavman bilong Briten i bin rausim em long Australia i go long Nu Silan.

Nem bilong Christian i no bin kamap ples klia bikos long em i askim mejistret long ol ol man-meri long ausait i no ken save long em. Mejistret Christine Gordan i laikim long nem bilong em i mas stap hait bihain long nogat wanpela i tok agens i bin kamap long dispela apil.

Shawn Christine i nau stap long bail moni na ol atoritis i askim long em i noken lusim New Zealand. Em i wanpela bilong ol 13-pela man kisim sas long pasim pamuk we i kamap long Pitcairn Ailan 40 yia i go pinis. Kot i kotim em long samting i bin kamap namel long 1994 na 1996.

Papa bilong Christian na olupela meya Steve Cristian na brata bilong em Randy i bin go kalabus long las yia. Na tu narapela foapela i kisim taim nau long kalabus na komuniti sevis kot i bin givim ol long las yia.

Dispela Pitcairn Mejistret kot i kamap long Nu Silan aninit long spesol lo bilong Nu Silan tasol ol dispela em i kot long Briten.

Fiji laik kamapim ofis long Kuwait

FIJI, SUVA - FOREN Afes Ministri bilong Fiji i lukluk long kamapim wanpela konsulet ofis long Kuwait. Minista bilong Foren Afes Kaliopate Tavola i tok wanpela deligesen bai i go log Kuwait na Iraq long dispela wik wantaim Minista bilong Labour Ken Zinck.

Em i tok i gat planti ol Fiji sitisen long Kuwait bihain long ol Fiji sitisen i go long Midel Is long kisim wok sekyuriti.

"Bai i gat laikim long kamapim ol gavman fesiliti long hap," Mista Zinck i tok.

Na tu gavman i gat laik long kamapim sampela kain rilesensip wantaim ol dispela kantri, em i tok.

"Long dispela nau bai yumi i gat sans long treid wantaim ol dispela kantri na rijen long hap," em i tok.

Mista Zinck i tok olsem dispela em i sans long strongim politikal na kamapim bikipela wok bung wantaim ol tu.

Asples rikrutin kampani bilong Fiji, Global Risk Strategies i tok em i amamas long dispela ting bikos em i laik bai salim ol Fiji nesenel long kain ples we i nidim ol.

Frans les long lukim Frans Polynesia long UN list


FRANS POLYNESIA, PAPEETE - FRENCH Embesada i go long Nu Silan, Jean-Michel Marlaud i tok Frans i lukim olsem French Polynesia i mas raus long lis bilong UN long kisim indipenden.

Frans i amamas long lukim Nu Kaledonia separetis teritori long stap long lis bilong UN long kisim indipendens tasol em i les long lukim Frans Polynesia.

Embesada Marlaud i tok olsem gavman bilong em i lukim olsem i no gat yus long lukim Frans Polynesia long dispela lis.

Em i tok tu olsem ol Frans Polynesia i save gat politikel ileksen na i nogat as long ol i stap long dispela lis.

Nem bilong ol kantri we i stap aninit long lukaut bilong narapela kantri na i laik kisim indipendens i stap long dispela lis bilong UN.



WOLNIUS WOLNIUS WOLNIUS WOLNIUS

Amamas

Tripela dok i amamas na pilai long sno long Warsaw, Poland, long Mas 8, 2005.

Poto: REUTERS/PETER ANDREWS



Dok Gat Save

Dispela dok, nem bilong em Cheyenne, wanpela dok ol i save kolim Great Dane, i wetim mama bilong em Sandy Hood insait long ka bilong famili klostu long wanpela stoa long Bainbridge, Ohio, Amerika, long Mas 3, 2005. Em i wet go longplea taim tumas na putim het i kam ausait long ka long kisim liklik win. Poto: AP/AMY SANCETTA

Lapun Tru

Maria Olivia da Silva i gat 125 kris-mas. Em i save stap long Astorga long Brasil. Mama i bin karim em long Februari 28, 1880. Poto: AP/MAURILIO CHELI



Narakain Stail

Tupela man i helpim wanpela meri dring bia long wanpela paip long wanpela taim bilong malolo long Cancun, Meksiko long Mas 1, 2005. Planti ol sumatin i bin kamap long dispela hap long dispela taim bilong malolo. Poto: AP/ISRAEL LEAL



Senisim Laip

Pasto Ron Vietti (rait) wantaim ol arapela man, i baptisim Brian Welch, bipo man bilong pilai gita bilong wanpela bikipela ben bilong Amerika, Korn, long wara Joden long Mas 5, 2005. Welch i kisim baptis long wara Joden bihain long em i lusim ben bilong em na ol pasin bilong drag. Poto: AP/LEFTERIS PITARAKIS



Wol Rekot

Ol wol sempion sefa na ol lokel sefa i ron long nambawan bikipela sefbod long wol. Inap long 47 sefa i bin sanap antap long dispela bod. Poto: AP/STEVE HOLLAND



Radio Australia

Tok Pisin News

Hardin TOK PISIN long
Radio Australia 101.9 FM Port Moresby

Yu ken harim Radio Australia
long ol dispela Sof Wan Frikwensi

Tok Pisin Service
Sam - Yem: 6080 72401KH21
Tpm - 9pm: 6080 6020 6710 62504KH22

RADIO TOK PISIN PROGRAM TUNE IN: 101.9 FM

Radio Australia Tok Pisin Program - stat long mun
Mas 2005

MANDE Morning
6AM Stesen Op - Nius na Karen Afeas
6.30AM Ol Hetai - Musik na Chat
6.55AM Hetai na Musik
7AM Stesen Pas
7PM Stesen Op
7.01PM Ol Hetai na Program Priviu
7.15PM Spots
7.30PM Nius na Karen Afeas
8PM Hetai
8.15PM Musik
8.30PM Nius
8.40PM Spots Riplei
8.55PM Musik
9PM Stesen Pas

TUNDE Morning
6AM Stesen Op - Nius na Karen Afeas
6.30AM Nius Hetai - Musik na Chat
6.55AM Hetai na Musik
7AM Stesen Pas
7PM Stesen Op
7.01PM Ol Hetai na Program Priviu
7.15PM Musik na Chit-Chat
7.30PM Nius na Karen Afeas
8PM Mama Graun
8.15PM Musik/Spots
8.30PM Nius
8.40PM Hetai Riplei
8.55PM Musik
9PM Stesen Pas

TRINDE Morning
6AM Stesen Op - Nius na Karen Afeas
6.30AM Ol Hetai - Musik na Chat
6.55AM Hetai na Musik
7AM Stesen Pas
7PM Stesen Op
7.01PM Ol Hetai na Program Priviu
7.15PM Musik na Chit-Chat
7.30PM Nius na Karen Afeas
8PM Focus
8.15PM Musik/Spots
8.30PM Nius
8.40PM Mama Graun Riplei
8.55PM Musik
9PM Stesen Pas

FONDE Morning
6AM Stesen Op - Nius na Karen Afeas
6.30AM Ol Hetai - Musik na Chat
6.55AM Hetai na Musik
7AM Stesen Pas
7PM Stesen Op
7.01PM Ol Hetai na Program Priviu
7.15PM Musik na Chit-Chat
7.30PM Nius na Karen Afeas
8PM Youth
8.15PM Musik/Spots
8.30PM Nius
8.40PM Focus Riplei
8.55PM Musik
9PM Stesen Pas

FRAIDE Morning
6AM Stesen Op - Nius na Karen Afeas
6.30AM Ol Hetai - Musik na Chat
6.55AM Hetai na Musik
7AM Stesen Pas
7PM Stesen Op
7.01PM Ol Hetai na Program Priviu
7.15PM Musik na Chit-Chat
7.30PM Nius na Karen Afeas
8PM Wantok
8.15PM Musik
8.30PM Nius
8.40PM Youth Riplei
8.55PM Musik
9PM Stesen Pas

SARERE Morning
Solwev i pas long san na long nait i save kamap 2 minit
pastaim long wanwan aus. Bihain i gat musik na promo i
go inap long olgeta aus na lusim FM siknei.
Nait
7PM Stesen Op
7.01PM Ol Hetai na Program Priviu
7.15PM Musik na Chit-Chat
7.30PM Nius / Wantok Riplei
8PM Serah (Familii bilong Serah)
8.15PM Musik
8.30PM Nius
8.40PM Musik na Chit-Chat
8.55PM Musik
9PM Stesen Pas

SANDE Morning
Solwev i pas long san na long nait i save kamap 2 minit
pastaim long wanwan aus. Bihain i gat musik na promo i
go inap long olgeta aus na lusim FM siknei.
Nait
7PM Stesen Op
7.01PM Ol Hetai na Program Priviu
7.15PM Musik na Chit-Chat
7.30PM Nius / Serah Riplei
8PM Rvru
8.30PM Nius
8.40PM Musik na Chit-Chat
8.55PM Musik
9PM Stesen Pas

**TOKSAVE YU KEN HARIM RADIO
AUSTRALIA TOK PISIN LONG
ABO DE LONG WAN WIK**

RADIO AUSTRALIA PACIFIC BEAT PROGRAM

PASIFIK: Forum i laik daunim prais bilong ol bikpela kalkai long Pasifik

WOK bilong daunim prais bilong ol bikpela kalkai olsem rais, flaua na suga em i as tingting bilong wanpela nupela projek nau i kamap aninit long Pasifik Ailans Forum Seketeriet. Ol dispela kalkai na prais bilong ol i save givim bikpela hevi long ol famili insait long Pasifik rijon husat i no save kisim bikpela mani. Nau yet wanpela program bilong baim ol dispela kalkai long bikpela bikpela hap bai klostu kamap long ol kantri olsem Solomon Ailans, Kiribati na Tuvalu. Ol arapela kantri i ken yusim wanlain samting.

Prisenta bilong Pacific Beat i mekim askim: Jemima Garrett
Man i givim bekim: Jared Morris, Import Management Advisor, Pacific Islands Forum Secretariat

Morris: As tingting long dispela plen em bilong kamapim gupela ples, fremwok, ol netwok na bilp naim long olgeta manmeri husat bai wok long en. Em bilong kamapim gupela ikononik kalkai. Em i isi tasol we ol impot kampani i ken bung wantaim long nesenel o riji- nol level na bungim olgeta wok bilong ol wantaim long traim na kisim gupela prais long ol saplala bilong ol. Na yu ken yusim wanpela broker o man bilong wok olsem mausman bilong yu.

Garrett: Ol liklik famili insait long Pasifik bai inap long sevimi hamas tru sapos i gat wanpela sistem bilong baim ol dispela kalkai long bakstua?

Morris: Bai mi tok olsem. Sapos yu bung wantaim na yusim stret- pela rot bilong kisim samting na bihainim ol saplala teknik, yu ken mekim samting olsem 10 pesen savings long ol ka na sip bilong karim samting, ol kontrak na ol arapela samting.

Sapos yu aplai long tred bilong mipela long rais flaua, samting olsem 10 milien dola long wanpela ya, mipela bai lukluk long sevim samting olsem 1 milien US dola long wan wan ya sapos mipela i mekim stret.

Garrett: Wanem ol kantri i ken redi long statim dispela program bilong baim samting long buk o long ol bikpela bikpela hap?

Morris: Mi ting olsem ol dispela program bai i karim bikpela kalkai bilong Solomon Ailans, Kiribati na Tuvalu. Em bikos ol i liklik na i stap klostu long bung wantaim naim long ol bikpela impota. Ol gat wanlain samting bilong baim, ol i gat rot i go long ol wanlain maket na i gat wanlain rot bilong bilim ol samting insait long ol kantri bilong ol. Olsem na mi ting ol i stap long gupela posisen long statim.

Garrett: I gat samting o program i redi nau bilong dispela tripela kantri?

Morris: Nau yet mi wok long pinisim value-chain wok glasim long ol rot bilong wanwan komoditi na traim long skelim strong bilong kalkai bilong ikononik bilong dispela tripela kantri tasol. Yes, mi wok long wok long wanpela samting i stap.

Garrett: Planti kantri i makim pinis wanwan rais o flaua impot bisnis bilong kantri bilong ol. Ol bai wanbai long dispela nupela plen o mogat?

Morris: Mi no lukim olsem dispela bai bagarapim sindaun bilong ol. Wanpela samting we yu mas tingim em insait long Pasifik, ol dispela kalkai i kamap samting we ol manmeri i mas i gat, olsem na i nogat banis long prais bilong ol. Na nau mipela i lukim olsem mipela i mas painim gupela rot bilong karim ol dispela samting i kam insait. I no long bagarapim ol pipel; sapos samting i orait, mipela i no inap long senisim. Dispela program em bilong lukluk bek long saplala sen i stap nau, strong bilong em na wanem ol rot mipela i ken strongim.

Garrett: Nau yet prais we ol impot bisnis long Pasifik i save baim i save senis klostu klostu. Yumi ken daunim dispela hevi olsem wanem?

Morris: Sapos yu lukim long saplala na diman rot, ol bikpela prais mipela i save kisim insait long Pasifik i save kam long ol lokol treida. Na dispela i save kamap taim saplala i save sot na i nogat inap kalkai long ailan na prais i save go antap. Olsem na sapos yu glasim olsem, dispela program em long givim inap saplala bilong ol dispela kalkai insait long Pasifik. Yu ken skelim long sait bilong wok treiding we ol impot bisnis i save painim toktok ol yet na bihain ol i ken painim toktok wantaim ol freit kampani. Dispela em i bungim wok wantaim na skelim long sait bilong rijon.

Garrett: Bai i hamas mun ya pastaim long dispela kain skim bilong baim kalkai bai i sanap na i wok?

Morris: Olsem mi tok pinis, em i isi tru. Ol impot bisnis i stap nau i mas bung wantaim na tok "orait, mipela bai toktok wantaim Forum na skelim wanem samting mipela i ken mekim long stretim wanpela agrimen bilong mipela olgeta". Na em i isi tru. Em i no hat long sanapim wanpela MOU.

O sapos em i ken bihainim rot olsem Wol Helt Ogenaisesen i mekim long baim bikpela hap marasin insait long Pasifik, we ol i sanapim wanpela sentrel bak marasin stua long Fiji. Dispela bak stua i save baim olgeta marasin, bihain ol wanwan memba insait long Pasifik i save baim long ol.

Olsem na sapos yu toktok long Wol Helt program, em bai i gat hat wok long en tu. Tasol sapos yu lukluk long bungim ol kampani long traim kisim sampela maket, yu ken mekim insait long 6-pela mun tasol.

PASIFIK NIUS

Ol toktok naim long East Timor na Australia i stat ken long Canberra

OL TOKTOK naim long East Timor na Australia long wanpela Seabed Boundary o boda aninit long solwara i stat ken long Canberra long Mande apinun.

Tupela sait wantaim i autim tingting olsem ol i laik stretim dispela hevi nau em bilong wanem em i go longpela taim pinis long serim ol Wel na Ges insait long Timor Sea.

Graeme Dobell i ripot olsem, Australia i laikim wanpela tingting long Seabed Boundary bihain long 100 ya bilong larim ol i go het wantaim ol Wel na Ges projek long Timor Sea.

Canberra i laik givim Dili 3 bilien dola insait long 30 ya i kam olsem bekim bek bilong em i putim i go long sait bilong sovrenti.

Tasol East Timor i tokaut olsem em i no laikim tingting bilong stretim dispela hevi wantaim mani, na i tok i mas i gat rot we ol i mas painim bilong brukim gut ol risos.

New Caledonia polis pait wantaim ol Skwotas.

POLIS long New Caledonia i pait wan-

taim ol Squatters o manmeri i sindaun nating long graun bilong arapela man long wanpela setelmen klostu long kapi- tai siti, Noumea.

Midia long hap i ripot olsem, 6-pela polis- man na wanpela setelmen man i bin kisim bagarap.

Long stat, ol i bin askim polis i go bilong pasim wanpela pasin nogut, tasol taim ol i go inap long 200 pipal i bin bungim ol.

Polis i tok ol dispela manmeri i stat long sut long ol ston, bia botol, naip na ol narapela samting ol i wokim long ain.

Ol i salim narapela lain polis i go bilong helpim na ol i bin yusim Tiages bilong brukim ol manmeri i go nambaut.

Ol i holim pasim samting olsem 20 man- meri na nau ol i stap long kalabus.

Guria long New Zealand

WANPELA guria ol i makim strong bilong em long 4.2 long Richter Scale i sakim sentrel North Island bilong New Zealand. New Zealand Press Association i tok, naim bilong dispela guria i bin stap 10- kilomita samting i go long westen sait bilong Ohakune na i bin kamap 120 kilo- mita aninit long graun.

Em i tok, ol i bin pilim dispela guria long ski taun na long Marton.

WOL NIUS

Ikononik minista bilong Saut Korea i lusim wok

WANPELA top ikononik minista bilong Saut Korea i risain o lusim wok pinis bihainim tok-win olsem meri bilong em i bin kisim mani long ol dil wantaim rit estet.

Fainens na Ikononik Minista Lee Hun- Jai i autim pinis tok sori long dispela pasin nogut tasol em i tok, em i no bin mekim wanpela samting i rong.

Presiden Roh Moo-Hyun i tok orait pinis long dispela lusim wok bilong em. Ol i bin makim Mista Lee bilong kisim dispela tupela wok olsem Deputi Praim Minista bilong ikononik afeas na min- ista bilong fainens na ikononik, long mun Februari, long ya i go pinis.

Tasol ol i bin wok long strongim em long risain bihainim ol toktok olsem meri bilong em i bin kisim planti milien dola bihain long baim na salim graun bilong wokim fam long en.

Aninit long lo bilong Saut Korea, ol i ken baim fam land o graun bilong wokim fam o wok gaden tasol i gat ol haus bilong ol manmeri long en.

Hezbollah i sakim tok long Syria i mas kisimbek ol soldia bilong em

OL LAIN paitman ol i kolim ol Hezbollah husat i save sapotim Syria i wok long sakim tok i kam long ol kantri long wol, long Syria i mas rausim ol soldia bilong en long Lebanon.

Bikman bilong Hezbollah Sheikh Hassan Nasrallah i tok em na ol nara- pela grup bai i bung bilong soim kros bilong ol long wanpela mas long Beirut

long Tunde, bilong toksave long em i no laikim ol narapela kantri long suim nus bilong ol i go insait long dispela samting bilong ol yet, na tu long tok tenkyu long Syria long givim sekjurit em i stopim Israel long Lebanon.

Toktok bilong em i kamap bihain long Syria Presiden Bashar al-Assad i bin mekim tok promis long kisim bek 1240- tausen soldia bilong Syria long Lebanon long boda rijon.

Dispela i bilong bekim ol strongpela toktok i kam long ol kantri long wol long Syria i noken stap insait long polisi bilong Lebanon, na ol Arab kantri i wok long tok welkam long dispela.

Sikdengue fever i kamap long Torres Strait

TRIPELA save man bilong Australia long moskito i go kamap pinis long Torres Strait bilong stopim sik dengue fever long kamap bikpela na kapsait i go long bik ples Australia.

Ol i painim dispela sik long tripela man- meri long rijon na ol i ting narapela wanpela-ten-tri tu i gat dispela sik. Medical entomologist Peter Whelan i tok bikpela samting em long stopim dis- pela sik long kamap bikpela long Thursday Island nau yet.

Namba wan samting em long sopim ol manmeri bilong Thursday ailan long kisim dengue na narapela samting em ol lain husat i karim dispela sik raun, long noken go aut long ol arapela ples olsem not Kwinslenoa long wanpela lik- lik wara ol i kolim tenant creek we ol i ken karim dispela sik wantaim ol na givim long ol moskito long ol arapela taun olsem Cairns na Townsville.

Luksave long mipela husat i wok long ABC Radio Australia...



John Papik
Provins bilong John em long West Sepik o Sandaun, we emi skelim boda wantaim Papua Provins bilong Indonesia.

Kenya Kala
Kenya i kam long Central Province. Em i wanpela meri memba tasol bilong Tok Pisin sevis.

Paulus Kombo
Paulus ikam long Southern Highlands Province bilong Papua New Guinea. Nem bilong en i bikpela long Radio Australia long we em i save presentim "Tubuna Story".

Pearson Veturia
Pearson emi Executive Producer bilong Radio Australia Tok Pisin Service. Pearson ikam long East New Britain Province bilong Papua New Guinea.

Pius Bonjui
Pius i kam long East Sepik provins, na ino long taim igo pinis i produsim gavanens sinis "Taim Bilong Toktok". Em nau lukautim niu- pela "Yut Forum".

Warium Benson
Warium, husat i kam long East New Britain Provins, i wanpela long ol pipal husat i bin statim PNG sevis bilong Radio Australia long 1974.

Douglas Gabb
Doug, husat i bilong Madang Provins long Papua New Guinea, i save produsim na presentim wanpela program bilong susten- abol developmen oli kolim "Mama Graun".

Peter Jonah
Peter i kam long Rabaul long East New Britain provins. Em i save wokim program "Wantok Long Australia", we em i save tok- tok wantaim ol wantok bilong PNG.



ABC RADIO AUSTRALIA TOK PISIN



Salim ol pas i kam
long WANTOK
NIUSPEPA: P.O.
Box 1982, Boroko
N.C.D 111

@ email:
word@global.net.pg

Kamapim makro fainens skim long Kaintiba

Dia Edita,

Mi laikim maikro fainens skim i stap na wok long helpim ol Bogenvil pipel em i mas kamapim opis bilong em hariap long Mosbi. Na dispela skim em i mas i go daun tru long komyuniti levul, distrik levul, provinsol level na helpim wanwan manmeri, grup, kopretiv. Yangpela didiman grup, CIC grup, famili grup, sios grup, wimens grup, yut grup long karim aut wok long hauslain na i kamaut.

Mi gat bikipela sapot long maikro fainens i mas i go tru long Kaintiba Distrik na Kutidanga Distrik long Galf provins pastaim. Bikos tupela distrik i gat moa kopi i stap. Tasol ol i nogat man i go baim kopi bilong ol i go sting nating long graun. Na tu moa long 30 yia independens i nogat gutpela developmen i go insait yet. Ol trangu ol i stap yet long tum-buna pasin yet ol i

nogat rot. Ples bilong ol balus tasol i pundaun.

Mi gat bikipela sapot long maikro fainens i mas kirap hariap, nau long Kaintiba na Kutidanga distrik. Mi askim tupela Maikro Fainens Skim bilong Bogenvil Program, Simili na Sasteinabol Developmen Program, PNG Maikro Fainens long salim adres bilong tupela long pas i kam stret long mi. Adres bilong mi i stap pinis long Wantok Niuspepa. Stori bilong Maikro fainens i stap long Wantok long Februari 17-23, 2005. Tasol ol i no putim adres bilong ol long Wantok. Mi askim James Kila tu long sapos yu save long adres ples salim pas wantaim adres i kam long mi ples. Em tasol.

MR GIAMUKI KAUKESA
LLG KAINTEBA
PO BOX 164
KEREMA,
GALPPROVINS

Ol gutpela samting bilong yumi i save go we?

Dia Edita,

Mi wanpela mangi long ples Kirene insait long lalibu distrik long Mendi, Sauten Hailens provins. Mi laik sapotim pas bilong wantok ya nem bilong em Anga Rimu.

Em i bin tok long ol lida man bilong yumi salim ol risoses bilong yumi i go long narapela kantri. Yes brata Anga mi tu mi laik sapotim komplem bilong yu na mi laik tok olsem, ol memba bilong yumi ol i nogat ai olsem na ol samting bilong yumi long graun bilong yumi ol i salim i go aut pinis.

Nau ol manmeri na pikinini tu mipela save pinis olsem, gol, wel, ges, timba, pis, kopra na ol narapel samting bilong kantri bilong yumi PNG em i go aut pinis na ples bilong yumi bai bagarap olgeta. Yumi bai mekim wanem samting stret na bai ples bilong yumi i ken kamap gut gen?

Mi ting olsem yumi no ken lukluk tasol long gavman long stretim ples bilong yumi, nogat, yumi yet bai kamapim

ples bilong yumi yet. Nambawan yumi mas wok long graun bilong yumi yet na lukautim yumi yet. Namba tu yumi mas sekim gut ol man na votim ol, yumi no ken harim tok gris na kon toktok bilong ol na westim vot.

Nau mi yet mi papa-graun long SHP olsem na mi lukim olsem wel bilong Gobe na Moro em ol i pulim aut pinis na em klostu laik pinis tu na Hides Ges bilong Tari tu em pinis olsem na wanem samting bai kamap gen.

Ol i bagarapim graun pinis na bai ol i go long ples bilong ol bikos ol i no bilong PNG ol bilong narapela kantri na bai ol i go.

Olsem na yumi bai sekim ol lida gut na salim ol i go long palamen. Em tasol na yu laik sapotim o agensim yu welkam tasol long Wantok Niuspepa na bai mi lukim.

DOMINIC AWAPE
KIRENE, IALIBU-
KEWABI
SAUTEN HAILANS
PROVINS

Bung wantaim pasin i no stap long PNG

Dia Edita,

Lukim ol wantok PNG yumi kisim independens long namba 16 de bilong mun Septemba long yia 1975 nau klostu 30 yia pinis. Mi lukim Papua Niugini yet i no bung o i no sanap wantaim. Mi luksave olsem PNG i gat planti divisen o bruk bruk tingting i stap yet olsem bipo Australia masta taim. Tingting nogut em i stap yet olsem sapos mi bilong Papua orait mi tingting long helpim o sapotim Papua manmeri pastaim na bihain mi ken tingting long sevim arapela man long arapela provins.

Wankain olsem sapos mi wanpela man bilong Tola long Niugini Ailans bai mi tingim ol Niugini Ailans pastaim, olsem givim promosen long wok, o skul o planti arapela samting moa. Olsem tingim wantok na wan sait o wantok sistem em strong tumas nau. Mi askim PNG i no bihainim sampela pasin bilong waitman. Ol masta o waitman ol i bosim wanpela bikipela opis wok ol i no

save wantok sistem. Pasin bilong waitman ol i save bihainim save bilong man na ol i save givim wok long ol manmeri. Tasol yumi Papua Niugini yet bosim bikipela opis wok olsem bai yumi lukim planti wantok nogat save tu bai ol i givim nating wok o promosen. Em dispela kain pasin nogut bilong yumi PNG i stap yet na mi tok Papua Niugini i nogat bung wantaim.

Olsem na long tingting bilong mi rong i stap long yumi ol lida bilong kantri. Namba wan ol politisen, namba tu ol pablik sev-ens, namba tri ol spot lida, namba fua ol bisnis kampani na namba faiv ol lotu o sios.

Tasol ol sios ol i statim pasin bilong wok bung wantaim pinis na nogat problem olgeta lotu long kantri PNG i gutpela na tu ol i nogat sistem long em. Em ol bihainim pasin na lo bilong Papa God na pasin bung wantaim ol sios i wokim pinis. Long tingting bilong mi, mi bilip yumi ol lida bilong kantri

yumi tanim i go bung wantaim ol lotu o sios na harim tok bilong God. Painim gutpela tingting na save wantaim bel isi o amamas na pasin wok bung wantaim bilong yumi bai bai i kamap long dispela taim.

Wantok em mi tok pinis ya 4-pela rijin bilong yumi i brukim yumi pinis. Hailans tingim Hailans, Momase tingim Momase, Ailan tingting Ailan na Papua tingim Papua.

Long maus bilong yumi yumi save tok yumi Papua Niugini na yumi i gat sanap wantaim tasol mi tok nogat.

Bikos yuniti o bung wantaim i no i stap insait long blut o kru bilong yumi ol 5 milien pipel bilong PNG. Wantok sistem i daunim yumi pinis.

Em tasol na tenkyu tru. Sapos sampela i laik bekim mi wet tasol long ritim long niuspepa bilong yumi stret, Wantok Niuspepa.

SIR MATIABE YUWI, KBE
BOROKO, NCD



Pait kamap long stret lotu

Dia Edita,

Plis givim mi wanpela liklik spes long autim belhevi bilong mi. Long 17 de bilong Jenuari 2005 long Mt Hagen taun, mi lukim olsem wanpela pasto bilong wanpela bikipela sios em i autim tok.

Em i bin bagarapim narapela bikipela sios olsem wanpela man i kirap na paitim dispela pasto na pait i bin bruk.

Polis kirap na em i no bilipim toktok bilong tupela. Mi tingting planti olsem na mi laikim sampela man helpim tingting bilong mi.

Tok klia long Wantok niuspepa na mi bai amamas long ritim.

DAVID WANU
MT HAGEN
WESTEN HAILANS PROVINS

Toksave:

Sampela ol pas mipela i kisim i longpela tumas na i no givim spes long ol arapela pas. Inap yupela i sotim pas bilong yupela nogut edita i katim pas long inapim spes. -Edita

Kabwum bai senis olsem wanem?

Dia Edita,

Long Februari 24, Mista Guniong M. i bin putim komplem pas bilong em long dispela niuspepa na tok olsem Kabwum nogat sevis. Mita Guniong mi bai tokim yu 4-pela samting we i save pasim rot bilong sevis em:-

1. Yu yet na arapela, yupela em i sempion long politiks olsem na nogat sevis.

2. Laik bilong yu kisim na kaikai nau em i 99.5% i winim laik bilong tingim developmen em 0.5% tasol.

3. Yu nogat wokbung wantaim ol lida bilong yu. Yu pilai politiks bilong kisim na kaikai tasol. Olsem na nogat sevis.

4. Yu nogat rispek long yu yet wantaim wanpela na arapela olsem na nogat sevis.

Sapos yu yet i no senis, Kabwum bai senis olsem wanem? Maski long rait nating nating long nius na bagarapim gutpela nem bilong lida bilong yu. Bob Dadae em i no God bai em presim baten tasol na olgeta samting kamap long semtaim.

Long pas yu tok olsem "noken putim bilong ol pipel i go insait long poket we em i no alauens bilong yu." Brata Guniong, long strongim tok bilong yu, yu mas i gat evidens long soim klia. Gutpela man, yu mas skelim gut tok pisin bilong yu pastaim orait yu putim komplem nogat mining long niuspepa.

ESSENG B. SIZAP
WAIGANI
NCD

PNG Gavman mas stopim sipsip mit

Dia Edita,

Mi laik putim dispela askim long niuspepa bai ol pipel bilong PNG i ken ritim, harim, save na sapos ol i laik surukim tok-tok o oposisen tu i orait tasol. Mi askim Somare gavman inap bai ol i stopim ol sipsip mit o lemflaps i save kam insait long kantri. Dispela mit i no gutpela tumas long bodi bilong yumi. Taim hot i orait tasol kol wan gris i save pas na mekim bel bagarap. PNG gavman i mas stopim olgeta long baim ol ovasis lemflaps. Yumi long PNG i gat planti rot long kisim mit.

Lukautim kau long ol ples olsem Madang, Ramu Veli, Makam Veli, Goroka, Bena, Asaro, Kainantu, Wagi Veli, Baiya Veli, Ialibu, Suku Veli, Sumi Veli, Tari, Mendi na planti moa yet. Dispela em ol i gutpela ples bilong bulmakau, gout (meme), watabafalo.

Bilong wanem na gavman i no lukluk long dispela? Pik bilong ples tu i stap. Kilim na putim long aisbokis bai i stap longpela taim. Plis Sir Michael Somare na Palamen stopim long bringim ol sipsip mit i kam insait long PNG. PNG i no ol dok bilong kaikai sipsip mit.

MATT DEDEBOH HOLEYAH
NOT WAGHI
ISTEN HAILANS PROVINS

Rausim poka masin long PNG nau

Dia Edita,

Mi wanpela mangi Tari long Sauten Hailans provins na mi i gat bikipela laik long ritim Wantok Niuspepa. Olsem na tude mi raitim dispela bikipela toktok bilong rausim poka masin long kantri bilong yumi PNG.

Wanpela memba bilong Gumine long Simbu provins i tok aut long Palamen miting ya mi yet wanpela mi lus mangi long skul na mi sapotim tingting bilong dispela memba. Bikos yumi save pinis, long as bilong dispela kain laki nogut o poka masin pilai em i nogut tumas long brukim

poket bilong yumi na kaikaim olgeta mani bilong yumi i go pinis long poket bilong wanpela man tasol. Husat dispela man? Ansa em papa bilong poka masin.

Na husat i win? Yumi win? Nogat tru ya. Yumi traim traim nating i go i go na yumi lus stret laka? Na papamama bilong poka masin em yet i win i no yumi win. Olsem na mi bilip mani bilong lukautim sindaun bilong yumi famili long baim kaikai, klos, baim skul fi bilong ol mangi na baim haus sik marasin o arapela gutpela samting bilong sindaun na laip i go pinis long poka masin pilai. Na tu papa i

wet long kisim fotnait pei tasol dinau bilong poka masin i kaikai na papa i hat-wok nating na mama pikinini ol i hangre i stap.

Olsem na Wantok mi wanpela lus mangi na mi save sindaun tasol long ples na mi laik askim ol bikman bilong yumi long nesenet palamen 109 memba MP o memba ol i mas sapotim lo bilong rausim poka masin olgeta long kantri bilong yumi PNG.

KILUWA HARI
MENDI
SAUTEN HAILANS PROVINS



Bisnis bilong Groim Diwai insait long PNG - Ol hevi bilong lukautim ol samting insait long ol renfores ples

Ol hevi bilong ol samting i ken bagarapim diwai we i save bagarapim ol pikinini diwai insait long ol renfores eria

Olsem wanpela samting bilong graun, ol nupela pikinini diwai i ken kisim bagarap long ol kain kain hap. Ol dispela samting em ol fungi o masrum, ol binatang, animal, paia na win, ren na san.

Fungi

Ol strongpela sik nogut we i ken kilim ol nupela diwai em canker, rut rot, brens dai bek na gummosis.

Canker i save kamap insait long indai skin diwai na hap bilong diwai we i indai pinis.

Rut Rot (Root Rot) o (Cylindrocladium spp) i save kilim dai ol lip, ol brens o han diwai na i ken kilim tu ol diwai namel long wanpela na tupela yia o ol liklik kru diwai.

Pink disis o sik (we i save kamap long Corticium salmonicolor) em i wanpela bikpela sik we i save kamap insait long ol eucalypt diwai namel long 2 na 3 yia.

Gummosis i gat ol bikpela bruk long skin bilong em na i save kamapim wanpela kain retpela gumi wara.

Taim ol lip bilong diwai i tanim yelo, diwai i gat rut-rot fungi na olgeta lip i ken dai na em i ken kisim bagarap long bikpela win. Long daunim dispela sik rut rot, rausim olgeta han diwai i bagarap na indai pinis.

Ol Binatang

Plantii bagarap bilong binatang i save kamap long taim bilong hot san na ren. Mipela i ken bungim ol binatang bihainim kain birua ol i ken kamapim.

Ol binatang i save kaikai ol rut - Ol dispela binatang em ol temait o anis i save stap aninit long graun i ken kamapim bikpela bagarap. Ol i save kaikai ol bikpela rut na ol rut bilong ol sidling. Ol arapela binatang olsem em ol waitpela snek bilong graun.

Ol binatang bilong kaikai lip - Ol dispela samting em ol cutworm o snek bilong graun na ol bitel o binatang we i save kaikaim ol plaua insait long neseri na ol plantesen.

Ol binatang i save dringim blut bilong diwai. Ol dispela samting em ol aphids, psyllids, scale na wankain liklik binatang.

Ol binatang i save mekim hul long diwai. Dispela em ol bitel o binatang, ol moth na sampela ol katapila o liklik snek we i save kaikai skin diwai.

I gat kain kain rot bilong daunim ol dispela binatang nogut, sampela rot ol i save yusim marasin na ol arapela ol i save:

Rausim ol hap bilong plaua o diwai we i gat sik long en. Dispela bai stopim ron bilong ol sik long plaua o diwai. Yu mas rausim ol plaua na hap bilong ol plaua i karim birua bilong ol binatang long gaden na kukim ol long paia.

Rot bilong planim. Sampela taim, pasin bilong miksim ol kainkain plaua spisis, olsem ol pinat na arapela samting wantaim ol sidling bilong ol diwai i ken daunim ol wanwan binatang nogut. Antap long dispela, lukautim gut kaikai bilong ol plaua bai helpim long daunim hevi bilong ol binatang na strongim ol plaua.

Baiololikel kontrol. Yu ken daunim sampela binatang nogut sapos yu strongim birua bilong ol. Olsem kisim plantii ladybird binatang bilong Sentrel Amerika i go long ol Saut Is Esia kantri bilong daunim

ol leucaena psyllids (jumping plantii lice).

Ol arapela rot we i no yusim marasin. Yusim ol sop, karasin na wara olsem spre i ken kontrolim ol binatang. Sampela binatang i save wokabaut long graun, na ol cutworm o snek yu ken putim sit bilong paia raunim as bilong ol sidling na tromoi wara antap long en.

Rot bilong yusim marasin. Ol marasin bilong kilim binatang olsem malathion, diefdin na dimarcron i gat strong. Ol Fungicide olsem copper oxychloride i ken banisim ol yangpela sidling. Tasol yu mas was gut taim yu laik yusim ol dispela marasin long bikpela hap bilong wanem em i ken bagarapim olgeta binatang nogut tasol em i ken rausim olgeta gutpela binatang tu.

I go moa yet, taim yu yusim ol dispela marasin, yu mas yusim ol marasin bilong kilim wanpela kain binatang nogut tasol; bihainim gut toksave long yusim ol dispela marasin, putim strongpela klos bilong banisim skin bilong yu na wasim bihain long yu yusim na klinim gut olgeta samting yu yusim bilong spreim dispela marasin.

Ol rot bilong daunim ol binatang nogut i no wankain. Sampela taim i gat wanpela kain binatang i ken stap long wanpela kain hap tasol, olsem na yu ken yusim ol arapela kain spisis diwai bilong planim, o yu ken planim i go inap long wanpela liklik hap tasol. Olsem miksim meliaceae wok planim long Afrika.

Ol senis long pasin tumbuna bilong wok gaden i ken helpim tu. Olsem ol bagarap i kamap long Saut Kwinsien we bark weevil o binatang bilong kaikai skin diwai i no bin go bikpela bilong wanem ol i katim ol diwai long ol plantesen long taim bilong winta o bikpela kol, taim ol bikpela binatang i save karim kiau i no stap na ol i putim marasin long ol ples ol i katim long banisim ol gut long taim bilong san.

Ol animal

Ol animal i ken kamapim bikpela bagarap long ol plantings o sidling. Long Afrika ol bikpela animal olsem ol elefant na bafalo o bikbet bilong graun i ken bagarapim ol pikinini diwai. Tasol bikpela bagarap i save kam long ol liklik animal olsem ol pik, dia, sikau, rat na ol monki.

Banis i ken stopim ol animal. Yu ken mekim ol banis long mambu, ol han diwai, ol lip bilong kokonas o waia. Ol i mas tait na strong.

Banis long paia

Ol liklik pikinini diwai i ken kisim bikpela bagarap long paia long taim bilong drai. Ol i ken kisim bikpela bagarap moa taim ol i planim ol diwai long ples i gat bus long en o we bipo i bin i gat diwai long en na i gat plantii drai diwai na pipia i stap long graun yet.

Plantii taim yumi ol man i save kamapim ol dispela paia. Taim man i kukim ol bus i stap klostu, na ol foresta na ol papa bilong ol diwai i mas was olgeta taim nogut paia i kirap.

I gat rot bilong banis long paia sapos yu katim bus bai i ken stopim paia, rausim ol gras nogut i groa namel long ol pikinini diwai, opim rot i go long ol pikinini diwai, bungim wara klostu, na lukautim gut ol nupela pikinini diwai long taim bilong paia na rausim ol hap bilong renfores long mekim ol paia brek long helpim long banisim ol nupela pikinini diwai long paia.

Moa neks wik.

MCCARTHY & ASSOCIATES (FORESTRY) PTY. LTD.

National & International Forest Consultants

mccaf@datec.net.pg

"Long kisim tok stia long olgeta wok diwai"

Mipela no inap baim vanilla bin moa - Intec Trading

WANPELA bisnis husat i save baim vanilla long ol fama long Lae, Morobe provins, i mekim disisen long stop baim vanilla long ol fama bihain long sampela toktok long bisnis bilong ol i bin kamap we ol i no bin laikim long en.

Intec Trading i mekim dispela disisen na em bai sanap inap ol i pilim ol i laik senisim gen.

Ol lain husat i save baim vanilla long Lae bai i painim hat moa

long kisim ol gutpela stretpela prais bihain long sampela toktok Steven Mesa, husat i bin lusim Dipatmen bilong Agrikaisa na Laipstok, i bin mekim i no longtaim i go pinis.

Mista Mesa i bin sutim tok long Intec, husat i kam aninit long Papindo, olsem ol i nogat kwaliti kontrol o we bilong sekim gutpela ka bilong vanilla.

Intec i bin tok dispela i no tru.

Intec i kampani we i

save baim moa vanilla bin we i winim ol nara-pela kampani.

Tu long wanpela woksop we i bin kamap tupela wik i go pinis long long Situm, ausait long Lae, Mista Mesa i bin tokim ol fama olsem

lain husat i wok long baim vanilla o ol baia bilong ol na ol lain husat i wok long salim i go ovasis o ol ekspota, husat i nogat ol fam mas noken makim ol long Papua Niugini Spais Bod.

PNGFS kisim gutpela luksave

Paulus Tali i raitim

INAP long las wik bihainim longpela taim PNG Paia Sevis long kantri long namba wan taim i kisim gutpela luksave long Gavman bilong Japan.

Long dispela luksave Gavman bilong Japan i givim 308 paia sut (kout), 308 paia su na ol paia hos (raba bilong pamim wara). Wantaim dispela ol samting em salim ol enjina bilong em i kam we ol i sekim na stre-tim ol masin bilong sevis.

Em i salim tu ol pat o hap bilong sampela bilong dispela paia enjin. Kos bilong dispela ol samting i sanap olsem K1.5 we Gavman bilong Japan yet i helpim long baim.

Dispela helpim i bihainim program we PNG Faia Sevis i sain wantaim gavman bilong Japan long 1988 long Japan i givim 9-pela paia enjin, tripela reskiu yunit, tupela snokel na tupela ambulans long Sevis.

Sampela bilong dispela ol samting i stap long ol paia sevis stesen long Wewak, Kavieng, Kimbe, Alotau, Rabaul na Nesenel Kapitel Distrik.

Long taim bilong givim dispela ol samting embesada bilong Japan long PNG, Katsuo Yamashita, i tok em i amamas long wok wantaim gavman bilong PNG na ol pipel na dispela helpim i skruim dispela laik em gavman bilong Japan i gat long en.

"Dispela ol samting bilong paia em i bilong helpim ol wokman bilong PNG Paia Sevis na olgeta pipel.

Mi amamas long givim dispela ol samting i kam long yupela," Mista Yamashita i tok.

Moa yet em i tok em i amamas long lukim tu ol enjina i kam long stre-tim sampela ol masin long ol sevis stesen.

Long tok amamas long Gavman bilong Japan na ol pipel bilong em Sief PNG Paia Sevis Opisa, Issac K Silas, i tok em i tok tenk yu na luksave long gutpela wok bilong Gavman bilong Japan long bihainim dispela program we Japan Intanesenel Koperesen Ejensi (JICA) i save mekim wok long en. Na em i askim ol opisa bilong em long lukautim gut ol samting.

"Mi askim yupela long lukautim dispela ol enjin na ol PPEs (Pesenel Protectiv Ikuipmen) na olsem mipela i ken yusim ol long longpela taim. Sapos yumi was gut long ol ol bai lukautim yumi," Silas i tok.

Long lukim go het bilong PNG Paia Sevis i develop na helpim gut ol pipel long kantri Mista Silas i askim sampela saveman bilong Yunivesiti bilong Papua Niugini we ol bai kamap wantaim sampela lo, ol pasin we i go wantaim ol tingting na pasin bilong ol pipel, long helpim ol pipel we i ken was long ol yet na olsem ol i no ken lusim laip na ol samting long ol paia na olsem i isi we PNG Paia Sevis i no ken lusim nating plantii mani long wok.

Cat® Skid Steer Loaders

216
226
228
232
236
242
248



Engine performance and operator comfort maximise production.

Smooth, Easy Controls

- Two hydraulic joystick controls require only minimum wrist/hand movement, greatly reducing operator fatigue.
- Auxiliary hydraulics are actuated by a thumb-operated rocker switch on the joystick.
- Hand-throttle allows you to run at a constant speed, or an accelerator pedal can be used during load and carry, excavating or backdragging.

Operator Comfort

- Optional suspension seat adds operator comfort.
- Clear view of the work tool reduces operator fatigue and increases productivity.

Power and Versatility

- The Cat 3034 Engine is proven and reliable.
- Powerful hydraulics deliver outstanding lift and breakout forces.

Hastings Deering



PORT MORESBY
Phone: 300 8300
Fax: 325 0141

LAE
Phone: 472 2355
Fax: 472 1477

TABUBIL
Phone: 548 9045
Fax: 548 9155

RABAU
Phone: 982 1244
Fax: 982 1129

Pot Mosbi Ragbi Futbol Lig Dro

Lloyd Robson Pilai Graun

Sarere 12/3/04

Raun 1

Taim	Tim	Divison
12:00	West vs Hawks	A Gret
1:30	Waliya vs Paga	A
3:00	Tarangau vs Defence	A

Sande 13/3/04

9:30	Puma vs Magani	A
11:00	Warriors vs Royals	A
12:30	Kone Tigers vs DCA	A
2:00	2005 sisen lonsing	
3:00	Souths vs Brothers	A

Morata Ragbi Lig Gren Fainol

Sande 13/3/04

Taim	Tim	Divison
8:45	Northern Warriors vs Newtown Knights	C Gret
10:20	Gateway Sharks vs Kongo Parts	B
1:00	Megusa Brothers vs Tigers	A

Morata Volibol

Sande 13/3/04

Taim	Tim	Divison
1:00	Gateway Sharks vs Talapia Magpies	B
2:00	M3 Bulldogs vs Community Hall Tigers	A

Toksave:

Olgeta tim i mas kamap bipo long taim bilong pilai bai ol pilai i kamap long taim stret na pinis long taim. Sapos ol tim i kamap bihain long taim bai taim bilong ol long pilai bai sot.

Get fi:

Bikpela manmeri- K2:00
Ol skul manki- K1:00
Ol lain bilong salim samting- K2:00

Pot Mosbi Kriket Fainols

Sarere 12 /3/2005

Priliminari Fainol

Ples	Tim	Divison	Taim	Mat/Stumps
AmpaiaA Gret				
(2 Day)	Amini OS Hoods vs Chubb United	OS Hoods (Assn)	10:00am	United Clive Ely and Peter Mloide

(Arutu Goasa - reserve umpire)
A Gret (50 Overs) One
Day 'PATRONS CUP' FINAL
Colts Lamana Mariners vs Raukele
10:00 Raukele (Assn) Kamlesh Varshney, Iamo Manega

(Numa Alu - reserve umpire)

Sande 13 /3/2005

(2 Day) Cont'd Priliminari Fainols

Ples	Tim	Divison	Taim	Mat/Stumps
Umpires				
A Gret				
Amini OS Hoods vs Chubb United			10:00am	United (Assn) Clive Ely and Peter Moide

(Arutu Goasa -reserve umpire)
B GRADE (40 overs) Grand Final
Colts BNG Poreporena vs Lamana
Mariners 10:00 PCC Herea Pegi & Vele Kula

(Arutu Goasa - reserve umpire)

Toksave:

1) ALL FINALS TO BE PLAYED OUT WITHIN THE PRESCRIBED TIMES.
2) 'Scorebooks' to be handed in for results and update of Stats (records).

Pot Mosbi Soka Asosiesen Wiken

Prisisen Dro

Sarere 12/3/ 2005

Bisini Wan

Taim	Divison	Tim
0:800	MP1	MBS vs Oduka
09:20	MP3	Cosmos vs YMC
Kareko		
10:40	MP1	University vs KB Utd
12:00	MP3	Sunset vs Namu
13:20	WP	Telikom vs PNG
Gardener		
14:40	MP2	Telikom vs Boregaina
16:00	MP4	Blue Kumuls vs UBOG
17:20	MP1	Bavaroko vs
Modreams (washout game)		

Bisini tu

Taim	Divison	Tim
08:00	MP2	Rapatona (1) vs Gagala
09:20	MP3	Kurti Andra vs Raitman
10:40	WP	Lamana GFN vs Momads
12:00	MP3	LBC Defence (1) vs Bomana PC
13:20	MP2	Mirel Momase (1) vs Mungkas
14:40	MP4	Verave vs EVFC
16:00	MP2	PS Ruts vs Cosmos (1)

Sande 13/3/ 2005

Bisini Wan

Taim	Divison	Tim
08:00	MP3	Ela Utd vs Souths Utd (1)
09:20	WP	LBC Defence vs Souths Utd
10:40	MP1	Modreams vs Manambu
12:00	MP2	Be Pirates vs Yawata
13:20	MP4	Markham Yarangs vs Guria
14:40	MP1	Maset vs Momase
16:00	MP1	Souths Utd (2) vs LBC
17:20	MP4	Verave vs Markham
Defence (2)		
Yarangs		

Bisini Tu

Taim	Divison	Tim
08:00	MP2	Rosaints vs University
09:20	MP1	Bavaroko vs United PS
10:40	WP	Cosmos vs Sunset
12:00	MP4	Rapatona (2) vs Singkir
13:20	WP	University vs Rapatona
14:40	MP4	Mopi Soweto vs KG Utd
16:00	MP4	UBOG vs Singkir
(wash out game)		



• Chebu Aida Roberts bet na ron. Wantok winim pilai 5-4.

Toksave:

Ol Asosiesen husat i laik putim dro bilong ol i mas salim dro bilong ol i kam long feks namba 325 2579 o salim long email adres word@global.net.pg



• Ol manki Hawks skoa long Track Storms long Pot Mosbi prisisen 9's kompetisen long Pot Mosbi ragbi lig. Hawks win 18-10.



• Ol pilaia bilong Nesenel Palamen na Intenenel Reveniu Komisen i brukim bun long Nesenel Kapitel Distrik Pablik Sevens gren fainol long Sir John Guise soka pilai graun. Revenu win 1-0.



• Ol meri SP traim lek aninit long lukaut bilong wan pilaia Selina Karai (rait). Ol i pilaim Dolphins na win 10-4.



• PNG Kriket kepten Rarua Dikana givim plet long SP Brewery jenerol menesa Nigel Yeo em PNG i winim long ICC Is Esia Pasifik divison 2 kwalifaing pilai long Malaysia. Lukluk em Mick Nades.



• Wanpis Track Storms painim poroman long POM Lig

Bryant reip sas i pinis

BIKNEM Amerika Basketbol pilaia Kobe Bryant em polis i sasim long repim wanpela 20-ya meri i stretim dispela ol toktok wantaim dispela meri ausait long kot.

Long dispela as polis i no moa go long putim sas long em. Tasol i no save wankain toktok em Bryant wantaim meri ya i kamapim long stretim dispela hevi.

Tasol long wanpela toktok em loya bilong Bryant i feksim i go long The Asosieted Pres i tok olsem tasol dispela hevi em i orait pinis "wantaim amamas bilong tupela pati."

"Tupela pati wantaim ol loya bilong tupela i amamas olsem bai i nogat moa ol toktok i kamap bihain.

Polis i kamapim ripot bilong sas long Denver federal kot na dispela sas nau i pinis bihain long kain toktok i kamap.

Wanpela mausman bilong Los Angeles Lakers basketbol tim we Bryant i save pilai wantaim i no laik long mekim moa ol toktok long dispela amamas toktok namel long Bryant na meri. Long dispela taim Bryant i stap long Boston long ol Los Angeles Lakers bai mas pilai wantaim Boston Celtics na olsem em i no inap long bekim ol askim.


Sas egensim dispela 7-taim All-Star i brukim daun las ya yet tasol tripela wik i go pinis i kamap olsem kriminol sas.

Kriminol sas long wanem meri i tok dispela pasin nogut i bagarapim tingting bilong em, bagarapim gutnem na givim wari long em na dispela i stap yet stat long Bryant i bungim em long Jun 2003 long Vail-eria Hotel we meri i save wok.

Bryant husat i marit na i gat wanpela pikinini i tok sori "long pasin mi mekim long dispela nait na long ol hevi em i bungim bihain dispela pasin," tasol i go moa yet long tok olsem dispela pasin namel long tupela i kamap bihain laik bilong tupela. I no Bryant i repim em.

Ol toktok olsem tupela sait wantaim i toktok amamas long stretim dispela hevi i kamap bikpela moa stat long Mande bihain long L.Lin Wood, loya bilong meri husat i ring na tok dispela sas nau i pinis.

Ol saveman bilong lo i tok dispela hevi bai pinis sapos tupela sait wantaim i amamas long ol toktok na olsem bai i no ken



• Los Angeles Lakers Kobe Brant i dank long pilai bilong ol wantaim Detroit Pistons long wanpela pilai bilong ol. Foto: SMH

givim sem na bagarapim nem bilong tupela. Bryant, 27, i no bin tok promis long tokaut long kot long wanem samting tru i bin kamap long dispela nait long wanem long dispela taim em i redi long go long hausik long mekim wanpela operesen long lek bilong em.

Meri husat ol toktok i kamap olsem Bryant i repim em nau i marit na i gat bel.

Kriminol sas wankain olsem long sivil sas em difens bilong Bryant i tok meri i

giaman tasol bihainim kain wei em meri i kamap wantaim ol toktok.

Dispela sas i wankain olsem sas bilong Lodge na Spa long Cordillera.

Bihain long tupela i kamap long (hotel) rum bilong Bryant tupela i stat long kaikaim maus na Bryant i strong tumas we sampela taim nau em i holim nek bilong meri ya na bagarapim em, ripot bilong kotim Bryant i tok.

M/United gat bikpela wok long mekim



MENESA bilong Manchester United Alex Ferguson i tokaut olsem tim bilong em nau i gat bikpela wok long mekim long holim pasim Chelsea long ol poin long Inglan primia soka kompetisen.

Chelsea nau i gat 71 poin we pastaim long dispela ol i gat 69 na United i gat 63. Chelsea i surukim mak bilong em i go antap bihain long ol i winim Norwich City 3-1 long wiken. Gol bilong ol i kam long Joe Cole, Mateja Kezman na Ricardo Carvalho.

Moa yet Chelsea i gat narapela pilai i stap long pilaim na sapos ol i win dispela em tru bai givim moa het pen long United.

Na long narapela ol pilai Manchester United i dro wantaim Crystal Palace 0-0, Arsenal i pul gut i go antap long Portsmouth 3-0. Dispela i gutpela long ol tasol turangu long Liverpool olsem ol i bam long Newcastle 1-0 na dispela i bagarapim tingting tu bilong Liverpool long sapos ol i gat sans long go insait long

fainol dispela bai i nogat nau. "Dispela em i mak nogut long mipela," Ferguson i tok. "Sapos yu laik winim sempionsip yu mas winim dispela ol pilai, na mipela i no mekim dispela yet.

"Mipela i givim bikpela sans long Chelsea tasol mi amamas long komitmen bilong tim. Mipela i mas win, tasol long futbol sapos yu no kisim dispela sans long opim pilai yu gat maunten bilong go antap.

Long pilai bilong Chelsea na Norwich midfila bilong Chelsea Cole i kalapim tupela difenda bilong Norwich bipo long em i pairapim wanpela gutpela bal i go long umben bilong ol long 22 minit.

Tasol Norwich i no laik harim tok we i lukim Leon McKenzie i bekim long hetim bal long 64 minit we dispela em i namba wan taim long Czech Ripablik Chelsea gol kipa Petr Cech long abrusim bihain long 17 aua i go pinis.

Tasol bihain long dispela Kezman i tepim kik bilong Frank Lampard we bal i sut go insait na hapim skoa bilong Chelsea i go antap long namba tu gol. Na i no longtaim Carvalho husat i putim

namba wan gol bilong Chelsea long sisen i pinisim hop bilong Norwich wantaim gol bilong em. Long pilai bilong Manchester United na Palace tupela tim wantaim i gat ol sans long skoa tasol planti kik bilong ol i no kisim mak em bal i mas go long en.

Moa yet long sait bilong United we ol i mas skoa long hapim mak bilong ol i go antap.

"Sapos mipela i pilai na i bilip long ol wan pilaia bilong mipela moa long mipela i mekim long nau i nogat as tru we mipela i mas lus," Palace bos lanin Dowie i tok.

Long pilai bilong Arsenal na Portsmouth Portsmouth i luk moa long skoa tasol abrus na Arsenal Thierry Henry i pairapim bal bilong Arsenal hariap.

Henry i putim tripela gol olgeta long lukim Arsenal i pul gut i go sua. Na Liverpool i lus olgeta bihain long Newcastle i katim nek bilong ol.

"Dispela em i gutpela staik, em i go stret wantaim pawa," Newcastle bos Graeme Souness i tok. "Sapos yu long net (umben), dispela i wanpela fut longwe long gol pos na dispela bai hat long gol kipa i stopim.


Haphap Spot

Hewitt pilai gut



AUSTRALIA Lleyton Hewitt i win gut long Austria man Alexander Peya long stret set 4-2 6-3 6-4 long Davis Kap long Sydney Intenesenel Tennis Senta long Mande. Long taim ol i pilai Hewitt i namba tu long wol renk na Peya i 144 long wol. Hewitt i gat nem pinis long ol pilai bilong Davis Kap na dispela i no mekim ol manmeri i kirap nogut. Bihain long em i mekim tupela graun strok long Peya, Hewitt i pilai isi tasol wantaim nogat hevi. Wanpela taim tasol long namba tri raun em Peya i luk olsem bai abrusim Hewitt we long namba wan set bilong Hewitt Peya i winim. Bihain long dispela em i no moa traim long skruim dispela win bilong em we i lukim Hewitt i pinisim gut pilai win.

Woods kamap namba wan gen



Tiger Woods bilong Amerika i kamap namba 1 long golf long wol gen bihain long 6-pela mun we Fiji man Vijah Singh i stap namba wan long dispela taim. Dispela i kamap bihain long Woods winim 2005 Ford Sempionsip long Doral's Blue Monsta golf kos long Amerika. Na man husat em i pilai wantaim long win na kamap wol namba wan gen em wantok bilong em yet Phil Mickelson. Tupela i bin kamap long 72-hol pilai. Long mak bilong dispela pilai Woods i kamap long 24 anda, Mickelson 23 na Singh 19.

Lee no hariap tumas

AUSTRALIA boula Brett Lee i no boul hariap tumas olsem sampela bipo kriket pilaia i tok. Clive Lloyd husat i bin kepten bilong West Indies tim long Sentrol Amerika long 1970s na 1980s we long dispela taim planti ol pilaia i save gut long kain strongpela pilai bilong em i tok i tru Lee i boul hariap tasol boul bilong em i no haraip tumas long taim bilong em. "Mi ting olsem mipela i mas stap yet long kain mak bilong pilai," Lloyd i tok. Na em i ting ol foapela boula olsem Andy Roberts, Michael Holding, Joel Garner na Malcolm Marshall i nogut moa long foapela boula bilong Australia long dispela taim- Brett Lee, Michael Kasprovicz, Glen McGrath na Jason Gillespie. "Mi ting ol top Australia boula long taim bilong mi em Len Pascoe, Max Walker, Dennis Lillee na Gary Gilmour em mi lukim.

Ol nupela pilaia bilong ol NRL tim bilong 2005

Nupela yia na ol tim insait long NRL resis tu i gat ol nupela pilaia. Lukim ol nem bilong ol dispela nupela pilaia yu bai sapotim long 2005.

BRONCOS

Justin Hodges (Sydney Roosters);
Brad Thorn (NZ Rugby).



BULLDOGS

Christ Armit, Nathan Armit (Parramatta);
Ben Ciszowski (Brisbane);
Marvin Karawana (New Zealand)



COWBOYS

Johnathan Thurston (Bulldogs);
Carl Webb (Broncos);
Justin Smith (South Sydney);
Brent O'Connell (Burlough);
Gavin Cooper (Redcliffe);
Sera Mataora (North Sydney);
Kieren Kerr (Tigers).



DRAGONS

Michael Ennis (Newcastle);
Albert Torrens (Manly);
Colin Best (Hull).



EELS

Timana Tahu (Newcastle);
Mark Riddell, Henry Perenara (St George Illawarra);
Paul Stringer (South Sydney);
Chad Robinson, Ian Henderson (Sydney Roosters);
Glenn Morrison (North Queensland);
PJ Marsh, Marcus Perenara (Warriors).



KNIGHTS

Kirk Reynoldson, Dustin Cooper (Melbourne);
Jesse Royal (Penrith);
Dane Campbell (Brisbane Easts);
Grant Wooden (Wynnum);
Kurt Hancock (Bathurst St Pats).



PANTHERS

Paul Franze (Cronulla);
Michael Roberts (Tweed Heads);
Luke Dyer (Melbourne).



RABBITOHS

Shannon Hegarty, Peter Cusack, Peter Taylor, Ray Mougali (Sydney Roosters);
Trent Young (Brisbane Easts);
Germaine Paulson (Toowoomba);
Willie Peters (Widnes);
Scott Logan (Hull);
Michael Greenfield (Cronulla).



RAIDERS

Jason Smith (Hull);
Matt Adamson (Leeds);
Lincoln Withers, Michael Howell, David Howell (St George Illawarra);
Craig Frawley (Brisbane);
Jermaine Ale (Sydney Roosters);
Bronx Goodwin (Cronulla);
Damon Alley-Tovio (South Sydney);
Ben Jones (Redcliffe).



ROOSTERS

Amos Roberts; Richard Fa'saso (Penrith);
Joel Managhan (Canberra);
Brett Firman (St George Illawarra).



SEA EAGLES

Ben Kennedy (Newcastle);
Brent Kite (St George Illawarra);
Michael Witt (Parramatta);
Matt Ballin (Brisbane);
Ashley Alberts (Brisbane).



SHARKS

Adam Dykes (Parramatta);
Paul Mellor (Castleford);
Vince Melars (Warriors);
Hutch Maiva (Bulldogs);
Luke Covell (Wests Tigers);
Luke Harlen (Penrith);
Beau Scott (St George Illawarra);
Philip Leuluai, James Stosic, Cliff Manua (Newtown).



STORM

Dennis Scott, Jamie Feeney (Bulldogs);
Ian Donnelly (Manly);
Jamie McDonald (North Queensland).



WARRIORS

Steve Price (Bulldogs);
Ruben Wiki (Canberra);
Nathan Fien (North Queensland);
Todd Byrne (Sydney Roosters).



WESTS TIGERS

Paul Whaitira (Penrith);
Matthew Rieck (Cronulla);
Mark Meredith (South Sydney);
Nick Kouparitsas, Kosta Kouparitsas, Matt McLay (Canberra);
Aaron Mercer (Sydney Roosters);
Matt Jobson (Warriors);
Tim McGann (East Sydney);
Jarrod Saffy (Sydney Uni rugby).



Dogs redi wantaim difens

CANTERBURY Bulldogs i no bisi long tokwin olsem ol i no inap long holim Nesenel Ragbi Lig primiasip taitol ol i winim las yia.

Kosa bilong ol Steve Folkes i tok em wantaim ol bois bilong em i no bisi long dispela tokwin.

Bulldogs bai statim 2005 wantaim pilai agensim St George Illawarra long Fraide nait.

Bikman bilong ol Willie Mason bai no inap pilai wantaim Reni Matua na Ben Harris.

Bulldogs i laik traim mekim wankain samting Brisbane Broncos i bin mekim long 1992 na 1993 we ol i bin holim taitol inap long tupela yia.

Sydney Roosters i bin gat sans long holim taitol bilong ol long 2003 tasol Penrith i bin daunim ol.



• Nathan Hindmarsh bai sindaun long bens long namba wan gem bilong Eels.

Smith bai yusim Hindmarsh long brukim pilai

KOSA bilong Parramatta Eels, Brian Smith i tokaut pinis olsem em bai yusim man nogut bilong em, Nathan Hindmarsh olsem pilaia bilong brukim gem.

Smith yet i tokaut olsem em i save olsem ol i gat planti nupela pilaia na i luk olsem strongpela pilai bilong Eels bai kamap klostu long namel bilong sisen.

"Mi laik bilip olsem mipela i gat strong long winim sampela pilai. Tasol bikpela samting em mipela i ken strongim mipela yet taim sisen i ron.

Nathan Hindmarsh bai sindaun long bens long namba wan gem bilong Eels long Sarere nait agensim Wests Tigers.

"Ating bai mipela i putim Nathan i go insait bihain long 20 minit samting i go inap hap aua. Bai mipela i skelim gem i ron olsem wanem pastaim," Smith i tok.

Em i tok em i wok long glasim yet pilai bilong tupela nupela pilaia bilong em PJ Marsh na Mark Riddell.

Cowboys mas banisim gut Lockyer

NORTH QUEENSLAND i save olsem ol i mas strongim difens bilong ol taim ol i bungim Brisbane Broncos long hom graun bilong ol Suncorp Stadium long Sande.

Strong bilong tupela sait wantaim i stap antap pinis.

Brisbane i givim sans long yangpela hai skul sumatin Leon Bott na Cowboys i makim pinis nupela rikrut bilong ol Johnathan Thurston long namba 6 bilong dispela gem.

Bipo man nogut bilong Broncos Carl Webb bai sanap long seken ro agensim bipo klab bilong em.

Yangpela boi Bott (18 krismas) em i wanpela Australian Schoolboy Rugby sta na i karim liklik hevi long lek masol bilong em, tasol em i wanpela gutpela pilaia tru na Brisbane i gat bilip long makim em long namba wan gem bilong ol.



• Lockyer

Bott i bin skorim 5-pela trai long ol pri sisen pilai.

Bikman Brad Thorn bai kam bek gen long Ragbi Lig bilong Brisbane bihain long em bin pilai ragbi yunion long New Zealand.

Kosa bilong Cowboys, Graham Murray i luksave pinis olsem ol i mas banisim gut Darren Lockyer.

Raun 1

Fraide, Mas 11 - Canterbury Bulldogs VS St George Dragons Yu ken lukim long EMTV long 8.30 long nait.



Sarere, Mas 12 - Wests Tigers VS Parramatta Eels



Sydney City Roosters VS South Sydney Rabbitohs



Cronulla Sharks VS Penrith Panthers



Sande, Mas 13 -



Brisbane Broncos VS North Queensland Cowboys



New Zealand Warriors VS Manly Sea Eagles



Melbourne Storm VS Newcastle Knights

Gower i redi long 2005

BIKNEM kepten bilong Penrith Panthers, Craig Gower i redi long pilai strong bilong klab bilong em long dispela yia.

Long namba wan gem bilong em long Sarere nait, ol bai bungim Cronulla Sharks.

Nem bilong Gower i bin stap long pilai long ol prisisen gem, tasol kosa John Lang i laikim bai em i malolo na statim gut sisen.

Gower wantaim tupela arapela biknem pilai bilong Panthers, Luke Lewis na Luke Rooney i



• Gower

redi long soim strong bilong ol long dispela namba wan gem.

PNGAU redim ron manmeri

Andrew Molen i raitim

PAPUA Niugini Etletic Union (PNGAU) developmen skwat long kantri i wok long kisim gutpela trening inap tupela mun nau long redi long dispela Melanesian Sempionsip we bai i kamap long Lae long Epriel 22-24.

Program bilong ol i kirap long Januari yet i lukim 20-pela etlit i kam long Rabaul, Lae na Goroka na ol narapela liklik ples long dispela trening kem long Nesenel Spot Institut long skul holidet taim na dispela i givim ol gutpela taim long statim trening.

NSI i helpim PNGAU ken taim ol i daunim fi bilong ol long stap na trening long hap.

Ol lain long Goroka yet i wok long tren hat tru i stap aninit long was bilong kosa

Bernard Manau wantaim helpim bilong Ivan Wakit na Geoffrey Bai.

PNGAU nau i gat stongpela tingting long traim na holim planti gutpela skwat memba i stap long taim na trening long NSI bai ol i ken kamapim wanpela strongpela tim bilong 2007 South Pacific Gems long Samoa.

Ol kain sapot olsem ples bilong slip na kaikai na tu gutpela sans long skul em PNGAU i wok long givim long ol etlit husat ol i stap long ol longwe ples.

Presiden bilong PNGAU Tony Green i tok taim planti ol etlit i lusim skul ol i save painim hat long stap yet insait long spot bilong ol bilong wanem i nogat ples we ol i ken go long trening ol yet tasol sapos ol i stap long kain ples olsem Pot Mosbi, Lae o Goroka em i orait liklik. Long dispela as PNGAU i kamap wantaim tingting we ol i

save givim ol skolasip long ol etlit.

"Pilai bilong yumi long 2003 SP Gem i no gutpela tuma, em wanwan tasol i kamap gut. Ol man i orait tasol ol meri i no tuma," Green i tok.

"Olsem na yumi mas kamapim wanpela nupela na strongpela skwat bilong 2007. Yumi i gat sampela gutpela etlit i stap long tim tasol ol i planti," em i tok.

Kosa Manau i wok long amamas long pilai na pasin bilong Toea Wisil, Cecelia Kumalalamne, Sharon Henry, Anton Lui, Chris Bais, Andrew Yehweh, Kupun Wisil, Noel Tamtu na Joshiah Sasanui long ol i save kamap long trening olgeta taim.

Em i tok em i save amamas tu long lukim ol eksperiens etlit i save kamap na helpim long tening olsem Sapalai Yao, Ivan Wakit, Wally Kirika na Miriam Goieye i go pas long dispela.

SP winim ples long go long sofbol fainol

POT Mosbi sofbol bilong ol meri i go insait long fainols bilong ol nau na dispela wiken bai lukim das i kirap nogut tru long Bisini.

SP i gat sans nau long stap insait long fainol bilong A-gret sofbol bilong ol meri long Pot Mosbi bihain long ol i givim Dolphins 10-4 las wiken.

SP i kisim helpim tu long Budget Real Estate Wantoks husat ol tu i pilai strong long stap insait long fainol resis taim Wantok i winim Chebu 5-4.

SP nau i stap long namba fosa ples long poin lata na ol bai i kisim fri poin dispela Sarere taim ol i fofitim Norths husat i no moa pilai.

Poin lata nau i lukim top tripela tim i stap wankain olsem las wik wantaim Airways Bears i stap antap yet wantaim 35 poin, bihainim ol em Gazelle wantaim 34, BRE Wantoks 33, SP 27, Chebu 22, Admiralty 21 na Dolphins 17.

Tasol SP i bin wok hat tru long winim Dolphins long wanpela strongpela gem.

SP wantaim planti eksperiens i stap long sait bilong ol i lukim ol kam bek strong na winim gem we long taim pilaia Dorcas



• Airways Bears pilaia redi long paitim bal. Foto: PAUL ZUVANI

Horis i go pas wantaim shot stop bilong em Tesse Karai husat i putim wanpela

strongpela gem.

Dolphins husat i wok long kisim strong nau bihain long ol i traim hat insait long sisen i kisim bikpela helpim i kam long yangpela pilaia bilong ol Esther Kenjik long lep autfil.

Wantok i givim sans long SP taim seken bes Kurai Tovia husat i amamasim 21 kismas bonde bilong em i skorim laspela ran we i lukim ol i winim Chebu.

Ol tupela susa, Monica na Melinda Diapong i bin pilai gut tru bilong Chebu maski ol i bin lus.

Long narapela gem, ol sempion Airways Bears i luk olsem ol i pasim pinis dua long kisim bek maina primia sip taitol taim ol i givim Admiralty wansait wantaim 12-1 skoa.

Ol Bears i no givim sans na pitsa Margaret Joseph wantaim ketsa Terry Akorare i go pas long dispela.

Shot stop bilong Admiralty, Dausilla William i pilai strong long tim bilong em tasol em i no inap long winim gem. Long pilai bilong ol man i bin gat ren long dispela taim na olsem ol pilai i no bin kamap na olsem ol bai pilaim gen dispela wiken.

Kone Tigers winim Pot Mosbi ragbi lig 9's prisisen kompetisen

Andrew Molen i raitim

KONE Tigers i kam bek strong insait long las tri minit bilong gem long winim dispela Pot Mosbi pri ragbi lig 9s tonamen las wiken egensim Brothers (1) 28-26.

Ol tim i pilai yet long Fraide i kam inap tupela laspela tim, Tigers na Brothers i brukim bun long gren fainol.

Ren i bin kam long Sande we bal i wel na i hevi long kikim i go longwe tasol ol pilaia i ron, takol na skorim ol trai gut wantaim gutpela singaut bilong ol sapota.

Ol manki bilong Stanley Haru i no westim taim we long fes faiv minit ol i go putim tupela trai we i lukim ol i go pas wantaim 10-0. Brothers i kirap long silip bilong ol na bekim wantaim tupela trai long levelim ol skoa 10-10.

Tigers i skoa ken na ronowe long Brothers 16-10 tasol ol i kam bek sot long tu poin wantaim 16-14 we ol i holim olsem inap long hap taim. Pawa fowet bilong Brothers Chris Lome, stail ful bek Nixon Nagle, spitman Wilfred Wilson na pawa senta Andrew Norman i no givim sans long difens bilong Tigers.

Ol manki bilong Tigers tu olsem ol man nogut long senta Romulus Mago na Eki Ene i no givim sans taim ol i holim bal.

Long seken hap brothers i skoa namba wan na Norman husat i wok long kik gut moa long planti ol narapela kika i kisim tu poin long putim ol i go pas taim insait long 20-16 poin. Hariap ken Brothers i kam gen we i lukim tupela i dro 20-20.

Tasol ol Tigers i no givap we i lukim ol i kam hariap na soka we i kisim poin bilong ol i go antap 24-20. Brothers i kam bek na bekim dinau long i go 26-24 na long ful taim i kamap klostu tingting bilong ol i pas pinis.

Difens bilong Brothers i bruk taim ol pilaia bilong ol i no ron i go bek hariap na sanap na taim ol Tigers i tromoi bal i go i kam, ol i paulim ol we i no long taim i lukim ol Tigers i skorim wining



• Pilaia bilong Hawks (bal) wokabaut long kisim skrum bihain long bal i go aut. Foto: PAUL ZUVANI

tra i bilong ol. Long ful taim skoa i sanap 28-26. Long ol narapela pilai Royals (1) winim Wests 12-10 long Bol fainol na Post Puma (2) winim DCA 16-8. Sisen propa bai stat long dispela wiken.

Haphap spot

Airlines PNG sponsa

PLANTI OL manmeri i save wok insait long ol opis i mas lainim long pilai sampela kain spots o eksasasim bodi bilong ol. Dispela i ken helpim bodi bilong ol i stap gut na olsem ol i ken stap longpela taim liklik. "Ragbi tas gem em long kisim ol wokman i kam aut long ofis bilong ol we i ken bungim ol narapela wokman meri tu," Presiden bilong Papua Niugini koporeit ragbi tas Joe Yore i tokim taim Airlines PNG i givim ol yunifom i go long tas ragbi tim bilong em long las wik.

Planti manmeri insait kantri i save laikim ragbi lig olsem na pilai olsem ragbi tas em i gutpela long ol wokman bilong opid we ol i ken pilai long eksasasim bodi bilong ol. Joe Yore i bin kamap long wanpela bung we siaman bilong Airlines PNG John Wild i givim yunifom i go long ol Airlines PNG tas tim na tu baim K1000 afliisen fi bilong tim. Kepten na tim lida bilong Airlines PNG ragbi tas tim Martin Joffey i tok amamas i go long Airlines PNG olsem dispela i soim olsem kampani i gat laik long helpim ol liklik lain olsem tim bilong ol pilai dispela i ken helpim ol wokman long stap fit yet. "Dispela komitmen bilong siaman Wild i soim ol wokman long wok na pilai gut na mekim kamapani amamas," Mista Joffey i tok. Dispela ol samting i bin kamap taim Airlines PNG i winim MVIL 5-1 long pri-sisen koporeit ragbi tas gren fainol. Nau yet POM koporeit ragbi tas i gat 81 tim we i kamapim 7-pela divison. Bihain long Septemba long dispela yia bai POM koporeit ragbi tas bai karim klostu olsem 125-pela plaia na ofisal i go long Lae long pilai long dispela Papua Niugini Nesinol Tas sempionsip.

Pot Mosbi rot rana

INAP olsem 57. Pot Mosbi rot rana i bin ron Ward Strip kos we ran i stat long Ward Strip long Gordons na go raunim 1.8km na 4.5km resis na go bek long Ward Strip. Ol lain i ron i bin spit tru long dispela kos o rot bilong wanem dispela graun long dispela kos i flet o level na i nogat maunten o krangki ples na tu i gat liklik rot bilong ron olsem na ol i no ron long bikpela ot tru. 8-pela rana i pinisim sotpela kos we Peter Nula i bin kam pas long ol wantaim taim bilong em 8.40 minit. Bihain long em long seken ples em Romie Sanata wantaim taim 9.00 minit. Na namba tri ples i go long Mathius Andrew long 9.51 minit. 49 rana i pinisim longpela kos na Rusel Hasu (14.49), David Reuben (14.56) na Simon Pini i ron hariap moa long ol narapela long winim poin long edurens salens o salens bilong lukim husat bai i stap long taim insait long resis. Dispela salens i mekim planti rana nau i save go long bikpela stadium long Waigani long trening long spit. Edurens salens kompetisen i kam insait long mekim ol rana i ken winim moa poin. Sampela man husat ol i lapun liklik i bin wok hat long pinisim longpela resis bilong wanem san i wok long hat tuma long ol. Ila Geno i bin traim hat tru na i mekim taim bilong em olsem 23.29 na Jude Ronayne-Forde i bin haraip tuma na i kisim taim olsem 22.35, bipo dispela tupela rana i save kisim ol gutpela taim long ron bilong ol. Rob Southwell em i laik kamap spit nau taim em i putim mak long 22.18, em i lapun tasol em i winim sampela yangpela man. Planti ol lain i ron tu i kam long Polis bilong Australia husat ol i wok i stap insait long siti na ol i givim gutpela salens long ol rana.

Madang soka

MADANG soka asosiesen nau i luksave long ol wari bilong ol refri bilong ol. Dispela em i wanpela samting we ol i lukluk long en long fes miting bilong ol las wik we ol klab eksekyuiv i kamap long en. Jenerol seketeri Christopher Papiali i tok long dispela sisen bai olgeta fi bilong ol refri bai i stap insait long ol registresen fi ol klab i peim i go insait long akaun bilong MSA. "Dispela em long helpim ol refri taim ol i laik i kisim moa trening, baim nupela yunifom o long kisim sampela nupela refri," Papiali i tok. Klab afliisen fi nau bai i stap olsem K350 na ol primia na primia risev divison bai peim K10 olsem registresen bilong wanwan pilaia. All fi i mas kam insait bipo long pinis bilong Epriel. "I gat ol kampani i laik sponsorim sampela ol klab long dispela sisen." Sapos i gat kain laik i stap long sapotim MSA, dispela bai helpim long developim dispela spot insait long provins," Papiali i tok. Prisisen bai kik-ov dispela wiken na Papiali i tok dispela sisen bai i bikpela



ARL givim referi na kosing kos

Paul Zuvani i raitim

STAT Sarere dispela wik olgeta samting bai kamap isi taim Australia Ragbi Lig (ARL) Faundesen bosman Peter Corcoran i skulim ol man long kamap kosa na referi.

Namba wan kos bai kamap long Lae long dispela Sarere long ol kosa na referi bilong Noten na Ailan rijon we 60 man olgeta bai kamap.

Bihain long Lae em Goroka we ol kos bai kamap long Tunde i go inap Fonde 15-17 Mas long ol kosa na referi bilong Hailans rijon. Laspela kos bai kamap long Pot Mosbi long ol referi na kosa bilong Sauten rijon long 18-20 Mas.

Helpim Corcoran em wanpela ARL referi developmen opisa. Corcoran wantaim dispela man bai kamap long kantri tumoro.

Dispela ol kos tupela bai ronim i bihainim progrem bilong Papua Niugini Ragbi Futbol Lig we Peter Bevan bilong ARL las yia i bin kam mekim wok painimaut long wei bilong developim na strongim ragbi lig long kantri.

Pastaim long dispela man husat i laik kisim skul stret bai i mas pastaim painim skul na bihain em i mas painim sponsa long baim rot na go long Australia. I nogat skul progrem stret bilong kamap setifaid kosa na refri long kantri.

Long ol referi husat i gat nem na referim intanesenel pilai em bipo Graham Ainui, Wali Ainui na Tom Peles. Na nau Tony Kuni presiden bilong PNG Referi Asosiesen. Ausait long dispela i



• Marcus Bai wantaim Leeds Rhinos bai opim namba wan 2005 Ingran Supa Lig propa sisen pilai bilong ol taim ol i pilaim Warrington tumoro. Hia long piksa Bai i sindaun namba 3 long rait long fran. Piksa insait em Bai yet. Foto: REUTERS
Long NRL nius lukim moa stori long pes 30.

nogat moa. Dispela i wankain long ol kosa.

"Mipela i nogat planti bilong ol setifaid referi na kosa long kantri. I bin gat ol kos we sampela lain long Australia (Kwinslen) i kam na ronim ol kos long 1980s tasol bihain long dispela i nogat moa ol kos," Ivan Ravu wanpela setifaid kosa husat i gat nem long helpim PNG Presiden III i mekim histri long ragbi lig pilai wantaim Australia long winim Australia Junia Kangaroo long 2003 taim em i kosim ol i tok taim Wantok i askim em amamas setifaid referi na kosa i stap long kantri.

"Planti bilong ol referi na kosa nau i kamap tasol long ol klinik long lainim we bilong kosim ol tim na ronim pilai. Long kamap seti-

faid kosa o referi man i mas skul olsem wanpela wik na i mas sindaun long eksam pastaim. Moa yet em i mas kisim pas mak long kisim pepa bilong kamap setifaid kosa o referi.

Tasol em i amamas long kain kos i kamap long helpim planti bilong ol referi na ol kosa.

PNGRFL i bilip olsem ol lain husat i kamap long dispela kos bai go bek long lig bilong ol na lainim ol arapela lain long save ol kisim.

"Long givim ol kosa sampela gutpela trening progrem, mipela i mas lukim level bilong pilai (ragbi lig) i go antap. Dispela i wankain long ol referi. Gutpela fas ol pilai i stap long han bilong ol gutpela referi. Dispela kos i mas givim

tingting long ol referi long kamapim na ronim ol gutpela pilai," PNGRFL edministreta Jeff Wade i tok.

Ol kenidet bilong Sauten rijon long kosing em Sam Kaia, Jimmy Dabema, Stanley Haru, Vex Baro, Adrian Genolagani, Kei Tamarua, Heagi Isaiah, Richard Wagambie, David Gaius, Dairi Kovae, Guise Kuloa, Philip Boge, Chris Henarai, Emmanuel Meve, Henry Miro na Gideon Maleva. Ol refri em Sari Fareho, Tony Kuni, Guma Opi, Moses Tolingling, Joe Peregua, Joames Kaupa, Hicks Haiverava, Desmond Baira, Livingston Samson, Steven Farisa, Karava Haiveta, Sova Pisae na Dennis Gobula. Planti ol kosa na refri i bilong Mosbi lig.

Morobe Gems

MOA long 500 spot manmeri na ol opisa bai kamap long Mas 16-20 long lukim Morobe Gems. Dispela ol pilai bai kamap long Lae Siti.

Provinsol spot kodineta na Gems kodineta Ludwig Peka i tokim Wantok olsem ol tim bai kam long olgeta distrik long Morobe provins.

"Mipela i redim pinis ol ples bilong holim ol pilai na ples bilong ol tim long stap na kamap long ol pilai," Peka i tok.

"Sampela ol tim i no inap long kamap long hevi bilong mani tasol mipela i traim hat long lukim olgeta tim long kamap soim strong bilong ol. Em i tok ol pilai olsem soka, volibal, basketbol, netbol na etletik bai kamap.

Lae distrik bai kamap wantaim tupela soka tim (manmeri), tupela basketbol (manmeri), volibol; Kabum soka (man), basketbol (man); Tewae/Siasi soka (man), Menyamia soak (man), basketbol (man), etletik; Huon Galf soka (manmeri), basketbol (manmeri), volibol (manmeri) na etletik; Markham soka (tupela manmeri), basketbol (manmeri), volibol (manmeri) na etletik; Finschafen soka (man) volibol, etletik; Bulolo soka, etletik, volibol; Nawae soka, basketbol, volibol, etletik, netbol na Lae Eben soka, volibol, netbol, etletik.

Peka i tok long dispela pilai ol bai makim ol tim bilong Morobe long kamap long PNG Provinsol Gems we bai kamap long Goroka bihain long dispela yia long Oktoba.

Long tokaut long tim Peka i long makim wanwan ol spot tim bilong Morobe opis bilong em bai i no inap makim ol pilaia husat i nesenel pilaia long wanem ol i gat nem pinis.

"Mipela bai makim ol pilaia bilong ples stret. Dispela Gems i bilong ol na em i sans bilong ol i soim strong bilong ol long pilai.

Long opim ol pilai em i tok long askim Spot Minista Dame Carol long kamap. Moa yet em bai askim wanwan ol nesenel spot federesen opisa long kamap na lukluk long ol pilai na luksave long ol gutpela pilaia na makim ol long progrem bilong ol sapos ol i save olsem dispela ol pilaia inap makim kantri na kamapim ol gutpela pilai.



Coleman cooler istap long olgeta Brian Bell stua na Authorized Dealer